


陝西通志




第五十七卷

人物三

廉能下

DS  
793  
84555  
1735  
v.57







陝西通志第五十七卷

人物三

廉能下

明

潘友直字孟舉澄城人洪武初由茂材舉從太祖克陳友諒屢畫奇策陞工部尚書所至輒有聲績習儉服勤終始一節後乞骸骨朝廷寵賜金帛歸邸悉賞軍士同妻驅驢而歸行李蕭然惟圖書數卷而已

賈志

柳申漢中人洪武初拜大名太守爲政務推經術尚德緩刑郡人至

今首稱之

畿輔志

齊原芳乾州人洪武初爲鄆城縣丞元末兵燹民皆竄徙原芳繕城邑修室廬勸農桑通商賈流民聞風歸附邑以富庶

河南通志



張統字昭季富平人父月川文行知名統才識通敏洪武間由明經舉歷雲南右叅政晉左布政使凡雲南土地貢賦法令條格悉經裁定洪武三十年入覲考最爲天下第一張芹備遺錄建文即位召統爲吏部尚書時旁求遺逸會集闕下統鑒識精絕用當其才試編修實錄官得楊士奇奏爲第一靖難兵起錄朝中奸臣二十八人統與其數赦爲尚書如故上簡建文羣臣因解職務月給半俸居

京師統退自經名山藏

吳偉南鄭人領洪武甲子鄉薦知茂州多善政羌人懷服累官四川

左布政使明一統志

李昶字文煒涇陽人自少敦重孝友刻志向學領洪武丙子鄉薦歷官至戶部尚書凡儲蓄貢輸戶稅增損金帛出納皆調度規畫有法所得不少留頒賜姻族比卒家無餘雍大記



李暹長安人洪武中舉於鄉永樂初授戶部主事使西域踰萬里至撒罕馬兒凡五往返不辱君命遍歷諸國皆能得其懽心朝廷嘉之歷任戶部侍郎後又有高引先者亦長安人由進士官行人使朝鮮及境有使來迎稱曰館伴引先改爲迎候得上國體歸朝授御史巡方所至發奸摘伏若神終四川叅議

賈志

張毅安塞人洪武間以人才任廬州知府不挈妻孥止以一僕自隨布衣糲飯人不堪其苦毅處之裕如其清介近世罕有

延安府志

李著郿縣人太學生洪武中任御史明清有爲勤慎自持吏民無不

服

賈志

甄儀麟遊人舉人初任主事歷順天府尹兵部左侍郎清白之操始終不渝孫希賢官御史按雲南河南揚清激濁風裁卓然陞知府

未任卒

馬志



周道朝邑人以舉人官御史征雲南時總兵餽貨寶幾千金道一無所受時稱其廉擢山西叅政有惠政卒於官喪出民遮道哭奠三日不得行

朝邑志

馮進藍田人以人才授貴州道監察御史巡按山東陞四川按察僉事兼督學道衡鑑澄清轉河南屯田僉事抑豪強辨疑獄人擬之包拯後丁憂廬墓卒

馬志

王攻鄜州人洪武中舉人任懷慶府同知清潔自持有勸以置田宅者攻叱之歸里後囊無餘財篋中惟書籍數十部

賈志

楊榮宜君人洪武時以人材任郊縣丞廉慎清正政聲卓然永樂元

年旌異

宜君志

何回鳳翔人以大學生知祁門縣誠心實政惠義不著歷遷山西右

叅議廉勤自持始終不渝

鳳翔縣志



宋詡膚施人洪武中舉孝廉歷官有聲後累遷應天府尹

明一統志

高懷敬延川人洪武中以人材起家歷官有能名累遷湖廣按察副

使

明一統志

楊瑞鳳翔人洪武間以貢知墊江縣積穀二萬石市牛千隻民無力

者給之植道旁柳千株以休行者

四川總志

胡貞岐山人由舉人任永和令邑素荒殘貞至捐俸買牛種治耕具

教民樹藝後擢知應州改廣德俱有循聲

馬志

何福全鳳縣人洪武間以人材任縣丞有治聲陞威州知州威惠兼

行蠻人信服擢四川左叅議

馬志

權士安字惟寧澄城人洪武中由人材授南樂令至則詢民疾苦勸

課農桑修葺城郭祠廟百廢畢舉政暇作興學校文風丕振

澄城志

張綱米脂人以國子生擢江西南康府照磨盡心於職後累遷四川



按察副使

明一統志

王思吳堡人洪武中以國子生擢嘉興同知調揚州所至有聲後陞

四川右叅政

明一統志

王琰字廷玉鄆縣人由貢士授太寧令太寧民散處山中愚戇負固

琰與約令自至為平其獄訟賦役俾各得所再補長清令吏舞文

為患琰黜老吏三四人其患頓除治行為山東第一

馬志

王𡗗字克修鄆縣人洪武末監生授蘇州府同知蘇賦甲他郡期年

逋負皆完累陞工部尚書京師城垣外甃內土雨久輒壞𡗗督理

純甃之正統中以王振用事致仕𡗗用嚴峻為治卒無子

名山藏葉盛傳

龐惟方延安人洪武間為臨海令為政平恕折訟均徭民胥悅服

賈志

張賢字思齊鄆縣人永樂乙酉舉鄉試授吏部司務陞驗封司郎中

剛廉自持部中呼為板張超拜山西右布政使威惠並流遠近



服尋乞歸舊廬數楹僅庇風雨

王九思撰墓碣

趙倫邠州人永樂乙酉舉人宣德中歷官職方郎中有聲陞戶部侍

郎巡撫浙江左遷河南布政使卒於官倫持身廉潔蒞事嚴明人

不敢干以私

明一統志

李敬臣鳳翔人永樂中以材能卓異薦於朝歷官有聲累遷刑部右

侍郎

明一統志

艾瑛隴州人恩貢永樂中舉人材授浙江右布政使才能著稱

明一統志

杜棠字善政三原人剛毅寡合舉永樂丁酉鄉試任真定通判正統

中靖邊伯王驥征麓川陞職方郎中叅贊戎政復調南京戶部所

在得大體南部堂後樹忽冬花衆譽其瑞棠正色曰冬花春秋書

異何瑞之有其剛正類此性至孝母喪廬於墓側後陞雲南知府

政績著聞致仕

賈志



賀琳宜君人洪熙元年任浮山縣丞時有逋稅捐已俸並勸富家助

償自是流民復業以優治聞及憂去民泣送塞道

馬志

許璞鳳翔人宣德丙午發解授學官正統六年薦陞仁和知縣公平

廉慎輕徭薄賦民懷其德卒於官貧無以殮民爭賻以助葬仍爲

木主於本縣祀之

萬姓統譜

連俊邠州人宣德初舉人材任崇明令邑田多圯於海而民猶償租

俊力奏免癸丑歲蝗請以菽麥代秋賦軍民俱賴之明年復大侵

借常熟官糧數萬石以濟所活甚衆

萬姓統譜

董鵬同州人宣德壬子舉人歷海州知州惠政浹人改知膠州勸農

桑興學校早禱輒應人頌神君聞風歸附者二千餘戶

賈志

盧彬字文質咸寧人宣德中進士授戶部主事時朝命將伐麓川以彬督餉規畫得宜貴州苗叛彬擒賊首餘皆奔潰水西酋爲亂彬



單騎往諭蠻酋感化貴地以寧轉山西叅議

咸寧志

李善字元吉岐山人正統己未進士初知黎城黜嚴峻尚寬平獎孝

行勵耕織遷知汾州民間有到底清之謠累擢四川叅政告歸

賈志

陳厚乾州人以舉人知重慶府明於照物敏於治事時稱能吏

賈志

王璽字廷用盩厔人正統辛酉鄉魁任武陟訓導躬爲講解督課士

習丕變文教大興後遷武陟尹歲歉多盜設法賑貸盜賊衰息擢

監察御史抑橫除奸風聲赫著遷永平知府調襄陽撫恤流民以

數萬計後致仕歸子傳字良弼成化乙未進士歷官鄖陽知府陞

四川叅政所至有績時稱父子濟美

賈志

郝安字居中清澗人正統甲子舉於鄉任萊州府通判以邊才擢守

遼東安樂調守鎮寧有治績子志義成化己丑進士授評事進寺

副奉命審錄河南時方天旱志義定疑獄三十五人釋無辜者三



百七十八人取服罪者十人戮於市天即雨歷右副都御史巡撫湖

廣尋卒志義素性嚴毅持已處人循蹈矩矱所至以廉慎稱賈志子

序字宗殷弘治辛酉舉人志義卒序聞訃趨奔哀毀骨立藩臬以

金賄却弗受扶輿歸授例乞祭葬逆瑾素銜志義不附已遂矯詔

下獄尋謫戍瑾敗授高唐守高唐民悍序嚴明仁恕豪猾斂跡終

順德府同知名宦原曾孫由進士歷南少司馬忤權璫罷歸賈志

宋欽字克敬乾州人正統乙丑進士授大理評事審錄罪囚必叅駁

求至當陞福建僉事遇缺尤盡心推鞠廉察奸墨罔有遺漏遷

河南按察使持憲愈嚴俄遷右僉都御史巡撫貴州建學立師大

興教化鎮守太監鄭鍾病故欽建言官多則民病貴州地狹而簡

乞免差內臣鎮守不報尋陞南大理寺卿數辨疑獄人皆稱平致

仕卒土紀撰墓碑



李儒王瑾俱涇陽人儒以監生令鄒平有貴戚奪民田儒奏聞歸田於民後知蘇州築堤四十里以障水患民爲立祠瑾以舉人任安平黠盜誣良瑾釋其枉植柳萬株以便行人時稱爲召棠之蔭

馬志

張文質字時中扶風人景泰庚午舉人知澤州輕徭薄賦舉廢釐弊凡愛民者無不爲之轉順天治中擢漢陽知府六載多惠政時權閹以文質同鄉里期一見卒不往遂罷歸

賈志

郭瑾字良玉華州人景泰庚午舉人磁州知州施德育民民以無訟

尋守蓬州歲大饑請賑院司牽制舊例不許瑾泣曰吾所育者天子之民也獨不能告天子耶遂聞上得賑蓬民賴焉九年入覲蓬

民隨赴闕借留以疾致仕

賈志

王俊字世傑邠州人景泰庚午舉人知嵩縣屏貪吏恤貧乏嘗濬順

陽濟民二渠灌田百餘頃邑人賴之

河南通志



劉介字師惠清澗人父鏞景泰癸酉舉人歷長沙知府折獄有聲他郡咸請就讞再補登州晉叅政益勵清操終始一節介中弘治癸丑進士由吏曹出守撫州撫多商販引價吏胥以舊留三分之一白介介叱之人服其廉逆瑾黨人李璫大索江南諸郡介獨不應瑾深銜之然卒無以中傷陞太常少卿終養歸子維禴字子孚正德間中進士知滑縣武宗南巡道出滑維禴從容經理百役立辦滑素健訟維禴以德意感孚訟獄衰息歲饑蠲賑全活萬計始黃河故道經滑民歲費金錢治河後河南徙封邱徵錢如故維禴罷之擢御史上疏皆切中利弊卒於官介孫大觀由舉人知孝義縣歷登州同知所至有惠政終趙王府長史

賈志

士麟大觀子萬曆丙

子舉人授定襄令前令白璧亦清澗人也闢地招民省冤釋枉爲一時良吏麟故出璧門下素悉定邑利弊至則修明政教潔已惠



民論者謂不負親師遺訓焉

嚴德志

邢簡字居敬咸寧人幼聰穎嗜學景泰甲戌進士授刑部主事用法明允爲尚書所重凡大獄多委鞠焉陞真定守嚴明憲度祛弊均徭吏畏民服陞浙江叅政時江海泛溢簡賑饑蠲稅又築堤設閘民賴以安後陞戶部右侍郎

正德志

劉傑字世英高陵人景泰五年進士授戶部主事遷知湖州府湖民尚訟傑盡滌誣冗譎誕之習而示以禮民遂靡然向風明年上歲幣官屬語存餘爲出納之圖傑曰吾安可割民以奉勢乎執事者大怒退幣六十餘疋劾不職左遷同知真定尋知永平府屬縣富民有巡校以盜誣者官府知而不爭傑得告即發執之其衆果遁傑因此中傷去

馬志

田濟麟遊人景泰甲戌進士由江西奉新令擢侍御按浙江抑豪右



辨疑獄有引裾折檻之風

麟游志

濟守真定甫下車即革吏弊察民

隱明年夏秋瘟瘡交作濟施藥療疾給棺葬屍歲荒不待上報開

倉賑濟全活無筭挫戚畹之勢釋盜誣之冤境內大治

畿輔志

白惟勤字勉之清澗人景泰中舉人任沁州知州加意撫循廉潔自

勵獄訟明察能得隱情陞衛輝通判沁人立祠祀之

清澗志

閻本字宗元邠州人景泰甲戌進士初任薊州倉儲出納平允吏無

敢為奸擢僉都御史撫薊門中修平谷豐潤玉田開平諸城池通

薊浮橋悉加繕構有貂璫怙權掾史舞智本盡法處之因是被讒

稱疾致仕久之復起為戶部侍郎

畿輔志

驥字伯仁本之子弘治辛

酉舉人歷刑部郎中為秋臺侍郎重後守太原致仕卒

邠州志

楊祥寶雞人景泰丙子舉人任四川重慶府通判陞夔州府同知廉

介有為剛毅不阿人號青萊物又岳池主簿丁燾者陝之鳳翔人



以清謹自矢方病篤有犯法者饋暮夜金璫固却之時以為難

馬志

王彞廓人由舉人同知解州廉慎剛斷百姓呼為鐵王遷代州卒

馬志

榮清字元潔藍田人天順初以材品授內府甲字庫大使職司金幣

出納惟謹遷山東昌樂縣主簿昌多逋賦前官峻急有鬻妻子以

輸者清寬限理之由是宿負漸清嘗署益都壽光篆二縣亦大治

子華號雙溪成化辛丑進士初任鞏令鞏治與溫縣鄰田稼每為

溫民所刈鬪傷者眾華築堤堰水界之爭端以息改嵩縣弭盜安

民教化大行丁外艱服闋補無錫邑有四虎為害祝而捕之一日

獲其三其一復自至民相謂曰猛虎猶知約束况吾民耶後為御

史巡按兩淮四川所至除奸革弊稱為名御史子察弘治丁丑進

士除山西夏縣令興學勸農有古循良風歷貴藩左叅議治聲赫

然

藍田志



員賢咸陽監生天順間任溧縣令初建水次倉留心學校

溧陽縣志

孟俊咸寧人天順己卯舉人知上杭縣爲治嚴而有則理芟剔蠹威

行惠流吏畏而民悅之擢監察御史巡按南畿以布政司叅政致

仕萬姓統譜

申瓊字廷瓚三原人天順己卯舉人任山東蒙陰令嘗集古昔孝順

事實爲民講解又督治農器以溥耕鑿之利教養兼舉蒙人繪像

祀之趙應元撰墓表

王政字尚德扶風人幼遇異人自經史外旁通天文兵法天順壬午

舉鄉試任蘭陽令復補威縣摘奸剔蠹平賦均役多異政陞澤州

同知再補遼州前後二十年清慎質直不渝其節俱祀名宦致仕

歸子孫不免貧窶賈志

朱賓字大賢中部人精易學舉天順三年鄉試甲申當會試不赴公



車曰必有火災已而果驗授陽曲令博詢民隱抑制豪強陞知陝  
州歲饑飛蝗布野賓竭誠步禱明日羣鳥來食殆盡陞南京中軍  
都督府經歷同里寇恕亦通易理以舉人任綿竹令有廉聲延安府志  
韓倫字秉彛朝邑人天順壬午舉人授武清知縣武清地近畿輔軍  
屯皇莊徧四境最稱難治時中官梁昉貴震朝廷牧馬斯地威焰  
百端倫不應昉怒縛里正懸高竿以示曰知縣見此否倫亦擒昉  
頭目竿懸之曰釋里正則釋頭目昉不得已釋之昉至京言倫不  
稱狀遂罷歸自是杜門不出縣尹某欲致之不得適倫子繼宗應  
里長役尹故苦之以致倫倫曰彼縣官苦里長我何與焉竟不見  
尹悔言之分守車平章平章曰尹誤矣致賢豈以威力為哉率尹  
踵門請至再三始一見云苑洛集

馮寧同官人父貴宣德時以平漢功官鹽井提舉寧登成化二年進



士歷四川僉事統芒部諸土官地甚險遠往時上官無一人至者  
寧攀木緣山親履其地躬行化導土司畏而懷之後正德中有洛  
川張文奎者亦以僉事道備兵川南時芒部弗靖諸夷互相煽動  
文奎結以恩信夷人感悅卒不煩兵而定文奎歷任山西左布政  
使廉名特著

賈志

紀溫字宗直綏德衛人成化乙酉舉人榆林衛地近邊人鮮知學余  
子俊爲巡撫奏設衛學官以禮聘爲師溫規格嚴整經指授者多  
成立謁銓授吏部司務士無問識不識皆知有紀司務陞太僕寺  
少卿綜理周密咸中條節不避勞勩卒於官

賈志

雍泰字世隆咸寧人幼苦學成化五年進士銓吳縣知縣吳中田傍  
湖悉淪湖漲前尹欲堤之厄富室不就泰舉前事竟成之號雍公  
堤入爲御史初巡南城後巡居庸紫荆一關及巡鹽兩淮已陞知



府余子俊總督宣大舉爲山西兵備副使千戶韋瑛誣收謀逆百  
人子俊將坐實上奏泰曰人命至重其可輕耶疑讞可子俊從之  
至京果俱免泰剛直有時名然行事時涉卞厲民有罪或杖至死  
太原知府告泰杖人至死狀收下錦衣獄刑部讞當酷刑罷官刑  
部郎韓紹宗走見王恕曰泰直臣公可避鄉曲嫌坐視耶降湖廣  
叅政弘治初陞浙江右布政使十二年爲右副都御史巡撫宣府  
諸所奏議咸當時務叅將李稽李東陽姪也爲部下所告泰將奏  
治之稽跪請受責度泰必見寬泰令縛下擊以大杖科道官承東  
陽意劾泰擅杖將官坐免旣歸日居韋曲別業不涉城市冢宰許  
進語人曰吾遙望關西有二高焉一華山一世隆也武宗即位起  
南京戶部尚書劉瑾泰鄉人有勸泰行金謝者泰曰吾進退在天  
居兩月瑾矯旨令致仕自是長居韋曲年八十卒泰奉身儉素貴



客至不過二肉爲尚書未製緋及卒家人製以殮

名山藏

泰擢御史

吳俗令行皆饋樓船公不受民固饋乃駕至張家灣還之吳人歌

曰時苗留犢雍公返舟

墓志

泰巡鹽兩淮見竈丁貧而鰥者幾二千

人比二年悉與完室旣去淮人詠曰客邊檢索渾無硯海上遺民

盡有家又曰了却四千兒女願春風解纜去朝天

見聞錄

東思忠字進伯華州人成化丙戌進士授刑部主事錄畿內刑獄平

反爲多嘗曰獄有微旨非敲朴所能致也陞松潘兵備內修政事

外樹兵威諸番莫敢侵邊松潘孤寓萬山轉輸斗米輒費數金主

藏吏多侵盜思忠盡滌其弊倉庾陳因又嚴減剋之禁正私鬻之

罰茶馬有序外釁不生又於大石佛嘴鑿山開路以便轉輸至今

宜之甲辰乙巳兩出軍勦逆命者直抵巢穴所獲軍器頭畜無算

西蜀士民倚爲長城卒官

康對山集

漢字希節思忠子弘治戊午舉人



正德中授池州同知招亡附籍戶口增往昔二萬劇賊劉七流劫吳楚漢選民兵數千以陣要路斷賊往來賊不能犯時石棣黠盜章仁胡天寵王浩等聚衆行劫漢分兵大洪諸嶺凡數十戰賊遂平有程文寶者殺人亡命匿於胡氏吏捕之急文寶反賄捕者使誣胡漢察有冤色鞠之得其情一郡驚服陞南昌知府歲饑出粟賑濟他郡悉來就食遷長蘆鹽運司使致仕野字希孟思忠第五子弘治壬戌進士授陳留知縣邑瀕河歲爲患野築堤禦之更以其淤爲桑麻地流亡來歸益戶口數千陳州盜殺典史行賄自脫野窮其事殺之於是河朔數百里皆欲赴愬陳留後陞刑部主事

賈志

侯恂字誠之白水人成化丙戌進士授戶部主事會計精當以能陞山東按察僉事督京畿軍儲累遷右僉都御史巡撫大同威振邊



塞轉副都巡撫三晉風猷益赫已召入留院提督操江恂負才鴻

碩操履清儉故能其官

同州志

李崙字世瞻臨潼人成化己丑進士授屯留知縣縣積猾舞文獄訟

錢穀皆出其手崙至悉按斃之陞戶部主事除弊革奸出納分毫

不爽出守廬州賑荒活萬人立俵馬法定鹽價創河橋廣積穀陞

河南左叅政

賈志

崙卒妻郝氏不能舉火守臣奏聞命所司月給米

養終其身

西安府志

梁澤字汝霖家貧爲掾縣令目所書牘奇之俾學舉成化己丑進士

歷陞巡撫貴州山東所至斷獄剖決如流彈劾不避權倖貪污吏

多解綬去以忤時謫茶陵令復歷浙江叅政皆以廉惠稱

三原志

周仲實字光甫隴州人成化己丑進士爲考功隨材量用鑒別精當

公謫倚以爲重遷河南副使歲凶人相食遍歷所部存省賑貸全



活甚衆弟仲宇字泰甫成化乙未進士授鹽山知縣累遷山東副使分理臨清時有妖僧惑衆仲宇擒之寘於法歷陞右副都御史巡撫湖廣時洞庭襄漢間劇賊充斥苗蠻梗化仲宇先後設謀擒之陞兵部尚書仲宇資性端重敷奏明切爲政尚寬和不喜更張故所在稱治

賈志

張曉字光曙三原人成化己丑進士知襄垣縣多善政召拜監察御史上書論萬貴妃事同列讀其辭皆縮舌上笞而釋之尋爲湖廣僉事施州亂全省震動諸僚皆莫敢往曉請行曰此可以義動至則宣朝廷威德亂者感服陞河南副使時河決爲患曉奉命督役導河幾千里俾復故道工竣晉按察使陳州有告毆死少年者三年莫能決曉閱屍驚曰安有少年缺其齒乎訊之果捕得少年其屍乃一乞嫗也事遂白尋以憂歸

馬志



張撫字世安寶雞人成化己丑進士授刑部主事性剛決不畏彊禦  
都督王義劉寧廣寧侯劉銓山西鎮守太監石巖各有罪衆莫敢  
決撫立訊決之浙江副使張蕙罪惡彰聞使者莫敢言撫治之遂  
服罪進四川按察副使蜀大饑捐俸易米賑之民賴不孱陞湖廣  
按察使楚多積盜撫出俸金捕之盜由是息尋晉刑部侍郎明年  
乞歸撫精於吏事所在以嚴明稱實志

郝滋字洪濟高陵人成化辛卯舉人授中牟令守廉奉公興利除害  
不踰年境內大治有水患歲常淹沒民田滋築堤十八里植柳衛  
堤復得閒田千頃民甚利之明年秋螟螣害禾滋祭於漢魯恭祠  
次日蟲皆殞擢均州守卒

劉時蘭  
撰墓誌

王輔字良弼同州人成化壬辰進士知長垣縣時值荒後民逋三年  
賦監司督之急輔從容畢辦民不知苦邑東北窪下每秋雨潦



頃俱壑輔鑿渠疏之盡爲良田徵爲御史出按四川貪奸斂迹素

性負氣尋謫鄖陽府同知罷歸

同州志

張繼字述之鳳翔人成化戊戌進士以戶部郎中出知順德府凡事務存大體持法平恕而人自不寃時歲旱引躬自責即兩境內多渠地高水下製桔槔以濟旱又教民植桑蠶事大興有盜劫鉅鹿捕官執齊民顧招等十三人皆誣服繼按得情皆釋之旣獲真盜人稱神明時有戚里占民田辨者輒毆死撫按檄繼往勘繼以地還之民貴戚悚息

賈志

韓紹宗字裕後朝邑人成化戊戌進士授刑部主事部有大獄尚書輒付之張文安伯者勲戚也族人奏其不法紹宗當訊輒置之律御史柯忠巡按直隸劾都指揮王章章故橫且多內援亦奏柯詔紹宗往勘章以守備體謁道中紹宗曰章犯人何得先謁勘官杖



之途比勘果如柯劭章免官大同鎮守太監石巖巡撫許進互奏  
劾詔紹宗往獲石十大罪而許無瑕獄成石奏紹宗黨文職差官  
改勘而紹宗卒非黨弘治戊申京師大水米價騰翔紹宗乞應糧  
俸者預支三月價可平詔從之東廠錦衣之獄皆付刑部有所枉  
不敢辨紹宗送獄堂審尚書曰此獄自廠衛來耶紹宗進曰大人  
第當視情法如何勿問所從來聽者聳然陞福建副使有屠執強  
市肉者以告蓋鎮守陳太監舍人也紹宗捕其黨陳曰若等不知  
新韓副使乎皆械送之而抵罪嘗受御史委同右布政分濬雙門  
河未兩月所治河皆考績遂署司事兼海道時海寇王某聚衆劫  
海上曰韓公不去我輩不生於是以千金賂鎮守鎮守即奏罷紹  
宗官紹宗居官守法毫髮不可動所至率綱紀其大者其餘不勞  
而正所立偉然



王坪字信之商州人成化中進士歷鳳陽知府時歲凶斗米千錢坪多方賑濟全活甚衆調南陽法令嚴明俸給外一錢不取弟塏字器之官地曹主政爲人尚節氣篤故舊時稱二難

商州志

宋德岐山人成化中進士由溫縣令歷浙江道御史四川副使法度嚴明宅心仁恕更能以清介自守至作令定溫輦之田巡方洗焚死之冤持憲靖王剛之亂尤宦績表著者又同里羅佑以貢生尹

寧陽亦有廉聲

賈志

張雄王鉞馬祥皆同州人成化時進士並官主政雄刑部鉞戶部祥工部雄素貧在部能礪節執法比卒也家無擔石鉞有幹濟才陞郎中總理糧務出納精覈人不能欺亦不敢撓以私祥始任都水督漕運挑直河五道築堤三百里漕艘賴之調營繕司清釐匠役陞虞衡郎中監遵化鐵冶剔弊恤工終山左鹽運使

同州志



邵錦商州人成化中舉人知雞澤縣修法度尚寬和損益因俗民不

知擾值流賊亂錦礪人心固守一方賴為保障

姓譜

謝文字顯道金州人成化戊戌進士為御史巡方所至剔弊糾奸不

避貴近後知河間折獄賑飢惠義兩盡終山東叅政

馬志

王章字廷憲膚施人成化中進士任大理寺副鞠讞平允以同官逮

罪謫同知高唐州蒞政剛果陞知州卒同縣高俊以舉人同知汾

州剛方明斷九年考績民遮留不得行又任三年以病歸

延安府志

于寬字克弘成寧人成化中舉人事繼母以孝聞在太學時友人任

良病沒良妻鬻二女歸葬寬為贖還率礪同志捐貲歸其喪後知

鞏縣積穀救荒築隄障水擢守鄧州築城禦盜有功鄧人尸祝

贛志

張瓚字廷奎中部人成化中舉人知眉州陳案積獄數日而判卒於

官貧不能斂直指倡有司賻之始歸曾孫志久知什邡亦有績



解經醴泉人成化庚子舉人弘治中令邯鄲性儉素自奉甚薄朔望謁文廟進諸生講釋經義課試嚴明貧民有累年負租稅者與約次第輸之不刑一人凡徭役躬自簽派輕重適宜政平訟理獄無

繫囚

畿輔志

陳梁字伯棟涇陽人成化間舉人任渾源知州時以南人充大同軍役不習水土多死者梁條上其事請以本土衛所軍代之報可陞贛州同知有巨賊數萬剽掠郡縣梁以計誘執百餘人乃遣人分諭諸賊使解散賊黨悉平城南漳江人多病涉梁作石橋人便之

稱為陳公橋

賈志

韓福字德府西安前衛人父鐸天順己卯舉人知茂州有聲福登成化辛丑進士歷滑縣章邱令廉威並著擢御史敢言國家利弊出守大名民不知吏道不拾遺奏課第一累遷戶部左侍郎因忤宦



瑾謝職歸

馬志

劉璣字用齊咸寧人成化辛丑進士初任曲沃令陞瑞州知府家食嘗不給公服外無餘衣時新昌盜起璣入賊巢面諭賊見璣皆羅拜聽命立時解散後歷遷至戶部尚書

賈志

屈直字道伸華陰人成化甲辰進士初直未第時值歲饑絕糧謁推官乞賑推官日三邀直會食曰吾所訊囚二人者將論邊戍數邀子來彼必求援吾釋之必厚謝子直曰賑可賂不可推官歎服授刑部主事部獄卒厚索囚賄不如意輒殺之直根治得狀白尚書論如法錦衣奸人依憑權勢郡縣賦至輒誘解人代納號攬頭解人多破產事覺白尚書按治及逮繫攬頭權勢人果邀奪之直入朝言於錦衣曰錦衣朝廷法官乃不容刑官守法耶明日攬頭至俱抵罪直歷刑部三司幾十年權貴憚之陞重慶知府府有妖



磚石毀房舍又時有火災直告於城隍妖火遂息夏旱禱於元武  
山有白雲如蓋往返隨之大雨如注歲大熟陞浙江按察使巨璫  
至浙怙勢作威欲三司跪謁直率衆不屈璫怒甚直從容言我輩  
見怒當何罪璫即改容揖衆入坐陞太僕卿太僕掌馬利近幸沿  
爲奇貨攬納請託直力禁之乃共譖於劉瑾瑾察得其情諸譖不  
行遷操江都御史復改督漕運以運船稽遲置簿給付運官日記  
所運水程及阻風守淺時日以備考核其法至今用之瑾旣敗某  
御史倡言直爲瑾鄉人數數遷轉宜罷遂致仕直毅而有謀剛而  
不虐才敏而力足以行之故所至有聲與人言侃侃無隱亦以此  
得罪苑洛集受善字我虛直曾孫萬曆乙酉舉人知晉州惠義著績  
擢真定同知司儲上谷以才幹勞勩見稱賈志

亢時霖藍田人成化丙午鄉試任長子教諭陞廬山令時天全叛逆



逐縣官掠居民人爲霖危之霖至開諭招撫患遂息又募勇士殺其酋類之難制者廬山立祠祀之

藍田志

谷賑咸陽人成化丙午舉人知巴縣以廉介自矢卒之日同官入視其家圖書數卷而已

四川總志

劉聰字達夫中部人性剛明果斷登成化丁未進士累擢彰德知府剪除豪強屬縣肅然宗室有風七兒者日至府需索無已聰疏其不法自是斂跡歷左僉都御史巡撫保定皆有異績長子佐登進士官戶部主事季子倌舉嘉靖鄉試知聞喜石州皆以清白強幹世其家璋字尚德聰弟正德庚午舉人授南和令時河渠久湮璋修復灌道民沾其利邑十七社十社土著餘七社以處晉民奉例墾荒不稅於是民有新舊田有多寡稅有盈縮璋躬履坵畝使田租相證民卒歸業陞知霸州人多豪俠剽悍璋懲一二魁黠境內



肅然城傍九河故道歲十九潦盜賊頻興璋平役薄征水不爲災盜賊衰息致仕歸璋曾孫紹萬曆時舉明經亦篤行君子也

延安府志

馮通字致遠同州人年十二補州庠生入太學成化中銓博野丞持已廉平不私受一牘嘗攝東鹿篆判斷明敏人頌神明陞知本縣東鹿人復留不欲還兩縣詣闕爭之冢宰以成命諭遣始已蒞博野凡舊政不便民者次第除之邑用大治憂歸服闋補繁峙繁峙素逋賦士不知學通勤勸課選社師訓民間子弟俗爲一變賦亦畢輸會大水没禾他邑承風減報通獨報全災邑人感悅俄病卒囊無餘物

賈志

雷爵朝邑人成化中舉人初知清苑歷守祁州廉謹自持大學士楊一清見之訝曰若非知清苑守祁州者耶歷聞子名今老矣有大名善地特以待子爲優游桑榆地遂授大名府同知至大名直廉



如初行部肅然匹馬果蔬自給

賈志

樊資字文質朝邑人成化中任榮縣典史歲饑出俸賑之人賴以生羣盜嘯起資督繕城池屹然保障仍單騎往諭之羣盜感其恩信立即解散

馬志

尚達字兼善同州人貢士弘治初任岳陽令政尚慈愛縣有澗水爲民患達開渠溉田歲旱出粟救濟

岳陽碑記

李鴻乾州人弘治己酉舉人正德六年知深州適霸州賊起縱橫河

北鴻率衆登城分僚屬守四門躬自提督往來巡眺賊知不可克乃引去一郡獲全興學校撫流移百事修舉百姓德之

畿輔志

郭楚字時芳咸寧人弘治庚戌進士知安邱王某者邑中大豪也令至輒啖以刺旣乃格制之桂蒞任使人啖之如昔桂發其事論殺之有父訟其子盜金者桂知其後母也謂翁曰亟歸金在若媼衣



筭中歸果得之父子如初後判湖州儲運先期輒辦遷泰州知州  
州多積蠹有巨惡號三虎桂至發其奸事斃之遠近肅然轉鎮江  
同知攝郡事決獄若神遷平陽藩邸素爲盜藪桂至後宗室咸畏  
其威盜賊遠遁尋擢叅政卒

賈志

王錦字在中醴泉人弘治庚戌進士初任襄垣令陞蓬州知州秉公  
執法請託不行饋遺一無所受時以剛明稱

四川通志

後陞山東僉事

兵備萊州制禦盜賊綽有方畧正德間致仕

醴泉志

姜實蒲城人弘治庚戌進士授曲沃知縣以廉能擢御史巡鹽河東  
值歲饑賑活萬計巡長蘆兼理河道凡權貴夾帶商貨及站鹽紅  
船一切革之鹽法流行陞湖廣僉事期年黜不職官十八人墨吏  
望風解綬生平寡言笑剛正不撓事親尤以孝稱

馬志

張憲字廷式涇陽人弘治壬子舉人謹言慎行爲學者軌範以篤孝



聞授絳州學正所造士多成立陞登封知縣有霸州巨賊數萬攻城憲招降被擄男女百餘人斬首五十餘級事聞賜勅勞之陞順

天府通判卒官

賈志

謝朝宣字汝爲西安左衛人弘治癸丑進士任監察御史巡按雲南

監鄉試令土官咸得觀聽鹿鳴遠人感化陞浙江副使因忤權宦

謫黃州同知招流移恤貧乏陞四川副使征勦有功斷獄無滯

賈志

趙繼爵同州人弘治癸丑進士授行人累陞山東副使備兵臨清皆

有治績充屬沂鄒滕費諸州邑積年逋賦建議蠲罷金鄉魚臺有

左道惑民者監司欲以叛治繼爵力言此愚民被誘第去其魁則

餘衆自解監司從之所活甚衆薊賊劉七等攻城繼爵聞變急築

外郭七十里浚濠崇櫓賊不敢犯尋免歸子國良字邦遂風度高

朗有智畧初以制科授工科給事中不阿權貴南畿與江右軍民



仇殺獄三年不決廷推國良往勘一訊而獄成會大察以飛語謫  
孝義丞量移宜興令遷彰德郡丞宜興民赴臺乞留以千計尋晉  
度支郎出守太原值有邊警國良圖畫方畧防禦甚周已與同官  
分城而守難民蔽野求入他皆嚴拒國良獨啟鑰納之民爲立生  
祠以功進按察副使兵備潞安

同州志

楊樛字子喬臨潼人弘治乙卯舉人授杞縣知縣剛明自任時宦官  
需索無虛日聞樛風力相戒無敢干者有夫婦夜出爲人所殺樛  
曰此必同舍所謀擒治之果得其情時流賊猖獗樛濬隍引汴水  
爲阻多設戰守具賊覘知遂不敢入遷汝州知州儲粟萬石以賑  
饑集屬邑俊秀授以經學士風丕變尋倅大名額糧歲有餘羨樛  
悉貯之庫又倅松江歲有織造餘銀數萬樛悉給機戶無所取陞  
長蘆運同卒弟樞字子極弘治甲子舉人授夏縣知縣擢御史巡



西城法令嚴肅盜爲潛遁後陞四川僉事平綦江盜賊有功

賈志

賀有年字天錫臨潼人弘治乙卯舉人通判鄖陽府清盜平徭修學

均賦尋補廣平境內多盜憲司嚴檄督捕他邑多誣陷有年開釋

無辜百姓恃以不枉旣而同知兗州府疏諸泉源隄防運河漕輓

以濟

臨潼志

張守字惟約涇陽人兄官弘治乙酉舉人任雲南知府土酋經年相

讐殺前太守不能治官至平之守中弘治乙卯舉人任封邱令時

巨寇劉六所在攻城多被殘破守百方禦之城賴以全陞昌平知

州州多勲戚內官守處之得所皆帖服陞永平府同知有以民田

獻勲臣者守繩以法累陞成都知府卒於官

馬志

孟醇鳳翔人弘治乙卯舉人知良鄉縣以能稱擢御史時劉瑾黨人

魏斌亂鹽法醇以成憲折之斌屈服陞成都知府駱胡盜起殄其



渠魁餘黨悉解散歷官叅政

賈志

馬應祥字公順咸寧人弘治丙辰進士授河內知縣時邑多風竄應祥攷戶數躬爲編次奸滑斂手自是輸將恐後時有殺人者不可跡先期禱越國江公祠下曰神許我得情則兩果兩翼日啟棺諸人羅跪有鼠自棺出竄一人衣襟下忽不見應祥指之曰殺人者汝其人色動推究果服又郊外殺一人未絕移縣門內許士民縱觀有一人嗟歎其側祥遂執之一訊即得縣中稱爲神明召拜吏部主事出備兵陳睢再改山西督屯屯田子粒積負併徵應祥請諸撫按許他物相準即以給士卒甫三月完十七八擢山西按察副使上疏乞休

賈志

李璽字朝信鳳翔人弘治丙辰進士授荊州府推官擢監察御史按河南山東直隸諸郡縣時劉瑾用事事多掣肘璽一切無所假貸



由此忤瑾逮獄尋降爲平溪驛丞陞襄陽知縣超拜河南副使折獄聽政嚴恕並行進職按察使致仕璽自起家至按使家徒壁立赴襄陽過洞庭羣盜操刃入舟旣見行李蕭索乃相與嗟歎羅拜而去

賈志

張潛字用昭華州人生而穎秀從李西涯受尚書弘治壬子楊邃庵督學關中以慶陽李獻吉洵陽張光世與潛爲三才子秋試三人同舉丙辰第進士授戶部主事劉瑾擅權深用避匿或曰公鄉人也不往且有禍笑不答擢廣平知府時盜起流劫郡邑潛多方捍禦郡中賴以無事按行屬邑省財力均徭賦黜舞文清滯獄興禮讓洛土熙然向風擢山東左叅政罷歸

賈志

羅循號雙泉白河人弘治己未進士累擢鎮江知府平賊有功終淮

陽兵備

白河志



高選字朝用高陵人弘治中進士授戶部主事督通州糧務召納精密權豪不能爲奸監督草場謝絕饋謁忤劉瑾致仕以薦復起郎中後緣事左遷鈞州同知時流寇圍鈞援入城外男婦五千俘賊數百人屹然爲郎襄保障陞兩淮運同尤能以清介自持卒於官貧不能歸櫬

高陵志

王億字本一鳳翔人弘治中進士授闕鄉令邑素衝罷宦寺往來擾民億力爲裁抑縣稱大治丁憂歸服除補濬縣不數月濬又治歷陞山東僉事分巡遼東皆以清直著尋督餉京師太監張忠弟舉素驕縱攬解河南歲餉侵沒至數萬官吏莫敢誰何億任事首發其奸狀杖之舉惶恐謝罪會獄未具而舉死忠遂訐奏上前謫戍南海越五年始放歸

賈志

李濟三原人弘治中監生任芮城主簿剛方練達因民爲治陞本縣



令改知臨潁潁民喜告訐濟至爲平其訟獄有頑悍者即懲治不  
少貸刁風遂息自是疏壅理枉釐弊振弱百廢俱起後以疾去囊

篋蕭然

賈志

侯珠麟遊人以舉人知大名縣持身廉勤撫民仁恕居憂服闋再補

闌鄉治亦如大名時尋卒官

賈志

馬隆字道亨中部人沉毅剛介與人寡合由舉人任大同司李廉平  
明斷戍卒之變僚佐咸走隆獨不動亂兵鼓譟入王府聞隆在遂  
退其見信於人如此終浙西通判

賈志

白比珩字康德綏德州人以貢生判臨清擢彭山令劍州茂州守所  
至有惠政弊不蔬食恬如也歷工刑二部郎中

綏德志

張綸興平人弘治辛酉舉人知羅江縣善決獄人頌神明擢知綿州



王納誨字獻可長安人弘治壬戌進士授工部主事治漕臨清嚴約束謹蓄泄公私便之調吏部課覈嚴正倖路杜絕忤當道謫易州同知覈軍實繕城郭晉河南按察司僉事理屯田河南寇亂屯多荒蕪誨給以牛種時其征斂三年屯政底績郡有豪黠怙勢武斷官司累年莫能寃誨執之伏法郡獄繫囚千餘按牒剖決不三日獄幾空改備兵叙瀘懷遠人固封守宣威敷澤人稱父母晉副使巡兩川風裁肅然蜀境爲之改觀

賈志

李伸字道甫三原人弘治壬戌進士授臨汾令晉王府軍校肆橫殺人前令莫敢治伸至悉寘於法境內肅然擢御史巡紫荆等關時礦賊千餘作亂伸執首惡餘黨解散

賈志

伸正德中守嘉興有大豪

侵官錢事覺廉得之即定爰書有殺兄謀奪其官者獄以不決伸

一訊而服舉措因民不干聲譽

浙江通志



張鏜字尚節咸陽人父英善屬文鏜舉弘治甲子鄉試就選安邑改  
靜海令靜海密邇京師爲水陸要衝天子南巡諸郡盜起百姓愁  
苦鏜供應弭捕各有條理境內安堵

漢陂集

周紹字克述高陵人幼與程汝修呂柟同學皆以聖賢相期許舉弘  
治甲子鄉試受戒縣令蒞政公清夷民敬服調任江陵時縣有江  
水爲害紹創築長堤民獲安居又墾田千頃至今利賴

西安府志

李恕字道夫富平人弘治中進士初任德平知縣遇事敢爲發積穀  
賑饑民歷陞四川僉事提孤兵數千破大盜藍四輩數萬衆以智  
勇見稱陞貴州叅議致仕

賈志

許世昌澄城人弘治甲子舉人授太和令陞順慶府同知時廣安賊  
勢猖獗攻城甚急世昌率民兵禦之圍乃解廣安方饑甚世昌極  
力賑濟又買給牛種荒蕪盡闢順慶素多水患城屢圯於水民歲



苦修築世昌開渠西山以泄之患遂息時涪州盜賊蜂起世昌奉檄勦平之院使者上其功世昌念母年高疏乞終養母卒服闋復除承天府同知會上南巡世昌署府事時改建陵寢開築城池創立廟社添設司衛皆倚辦於府竟以勞卒官

苑洛集

張羽字伯翔南鄭人登進士初授行人武宗初宦官劉瑾嘗以同鄉干公公獨不進後巡按山東會中官導上遊獵錫予頗濫公上疏曰明王慎德四夷咸賓不以禽獸病民猶謹衣裳之在笥也上覽其奏曰真御史也出守廣平建漳川書院建閘通水開田萬頃以利民生後超陞山西叅政首擒妖黨巡撫不恤軍士衆軍作亂公奮然入亂軍中衆畏公正直亂遂息陟江西廉使下車首訪巨奸豪滑盡寘諸法轉貴州布政使吏白積餘之金舊規不報公盡數登籍後陞大理卿釋冤抑活民命不下數百後陞工部侍郎展修



國學督修皇陵壯麗完固裁省節儉不下億萬自行人至司空歷

官凡三十年清貧如洗

呂涇野撰碑文

史華渭南人貢生弘治間知潛江縣勸課農桑葺理學校諸所廢墜

罔不振興爲一時循吏

湖廣志

程珏字兩玉朝邑人弘治時貢生爲富順丞下車捕巨猾大奸縣人

悅服有戴氏子殺三人獄久不具珏一訊而抵罪以母憂歸不復

出子範字君儀正德丁卯舉人初判開封府有倉官餽餘金範怒

斥之以艱歸復除大名府府舊治天雄鎮元時圯於河鞠爲茂草

範以暇時督率民兵樵蘇陶磚不煩公帑四門堅密屹然畿南保

障會河決爲患範相水勢自白犀皮口築堤七十餘里水患遂息

郡人爲立遺愛碑

朝邑志

劉澤字惠民三水人弘治中以明經任廣安州判陞捷爲知縣執法



不阿調洪雅城池學校煥然一新每食惟青菜一味蜀人皆曰劉

青菜後陞僉事

三水志

馬璿字文機涇陽人以掾爲平谷尉決斷訟獄遠邇稱平修葺古北

口邊城禦敵有功陞順義主簿司易州厰薪三月逋薪悉完限於

資格未竟其用人咸惜之

馬志

王朝雍字仲和朝邑人正德丁卯舉人任嚴州推官決獄公允署篆

淳安桐廬人有輿頌錄陞知澤州青羊賊起朝雍陷其中賊不忍

害叩頭送出因熟其險阻告當道按地進兵賊遂平歷陞山西僉

事

馬志

倪璣字公在咸寧人正德戊辰進士歷給事中後以誣謫佐嘉善立

法更化嚴保甲毀淫祠置義塚及社學書院甚有政教

姓譜

陞知定

州世宗入繼大統所經郡邑咸以錦繡爲居至定州璣獨以黃布



上嘉其儉約御書可以二字賜之尋陞山西口北道僉事

咸寧志

閻欽字子明隴州人正德戊辰進士選吏科給事中嘗抗疏勸毅皇視朝封駁不避權貴同列彈劾諸疏多出其手當道忌之遷河南兵備嘗推演武侯八陣圖爲九曲新書刊布以訓戰士募義勇修城塹謹烽堠遠近恃以爲安羅山勢豪張輔殺其妾及妾母妾母之族訟諸官輔反誣以他事陷獄死欽廉其狀執輔抵死信陽貧富兩民爭田里中二惡少素怨富民誘富者殺之旋又殺貧者誑其守謂自相殺欽按之具得情狀斬之以徇劉學恒者汝寧大盜也屢捕不獲欽出奇計執之論死其黨百人悉解散遠近駭服

賈志

楊淳字重夫先世出華陰縣明興徙臨潼淳登正德戊辰進士授御

史時宦官劉瑾索求科道瑕疵適決大辟衆皆推避淳請行瑾惡其不附已改工部屯田司主事辛未差荊州抽分請託不行後陞



員外郎管臺基等倣尋差遼東查盤軍器甲戌陞都水司郎中奉  
勅管理通州南旺河道時中官方橫舳艫往來陵轡州司需索無  
算有號二劉者勅使西域取佛其艘所費萬計沿河州司懼不敢  
支淳移檄擒治其黨衆斂迹而去陞寶慶知府南楚風浮俗又尚  
鬼淳首興學校以勸生徒擒妖誣毀淫祠浮風丕變調知鄖陽陞  
山西副使四川叅政次年陞本省按察使陞右轄尋陞左轄淳在  
蜀威茂諸邊將常因蕃夷入寇多殺無辜以邀賞資淳諭以禍福  
勸戒切至諸將感悟平生清忠自勵慕趙清獻之爲人遺榮養素

居室蕭然

呂柟撰墓誌

曹蘭字德芳咸寧人正德辛未進士歷山西布政使大同兵變蘭履  
險決策賊不敢犯晉山東巡撫子韓嘉靖乙未進士累陞貴州叅  
政蒞政嚴敏操履清潔所在有聲

咸寧志



南大吉字元善渭南人正德六年進士嘉靖初以部郎出爲紹興太守二守靳塘多智譎大吉下車郡事多諮於塘塘以書生易而謾之大吉陰察其情而陽爲不知者旣三月一日坐堂上召諸吏抱案集庭下數之曰若等善欺予某事然若以爲不然某事不然若以爲然何欺予如是亟持案來案至立剖數十事人人惴服塘駭汗辭舌不敢出一氣由是飭條教頒下邑懲奸戢暴不撓貴勢巨豪石天祿戴顯八者窩盜致富官府素不能治逮捕斃獄中每臨重囚必朱衣象簡秉燭焚香大開重門令衆見之望見者以爲神人不可犯是時王文成先生爲大吉會試舉主故稱門生大吉嘗於先生前自省臨政多過謂先生何無言文成曰吾已言之矣吾嘗言良知良知固自知也已自省加密文成曰往鏡未明可得藏垢今鏡明矣一塵難住此入聖機也勉之大吉爲葺稽山書院簡



八邑才雋子弟講習其中刻先生傳習錄振起絕學大吉政尚嚴  
猛喜任事不避嫌怨已濬郡河開上竈溪覈理侵壅以是籍籍謗  
騰郡人居吏部者銜之遂以大計落職去大吉每有書來文成問  
學無一語及升沉得喪間文成壯之還書相勗畢志此學

明史  
稿

穆世傑涇陽人正德辛未進士知樂安縣汀贛流寇攻縣世傑擒斬  
首惡黨與立散居官以興學校育材爲務鄰民爭歸附焉

涇陽  
志

郭田字汝耕長安人正德甲戌進士知嘉善縣性簡直政令嚴明堅  
持冰蘖操人有饋遺輒峻拒每見解銀指謂左右曰此阿堵物能  
亡身敗家爾等母爲所污時有上書陳其過者即榜之縣門引以

自罪

嘉興  
府志

張幾字知幾盩厔人正德甲戌進士司理廣平不阿權貴民有汙田  
歲苦潦幾教之種蓮鬻以輸賦尋調真定真定視廣平尤劇幾理



滯達枉決遣如流以考最徵入比部改丞松江職董漕運幾飛輓  
先諸郡召拜山東僉事按察青州諸郡青州濱海無賴者採山煮  
海恣睢睥睨尺符不能約束幾以間執諸豪遠繫之衆皆解散尋

乞歸

蓋屋志

畢鸞鳳翔人正德丙子舉人初知朔州勸課農桑興育士類累陞南  
京戶部郎中後補工部提督漕河制平水閘并涵水洞民獲灌漑  
利出爲大理知府姦豪斂迹胥吏格心郡中大治

鳳翔縣志

趙輔字君鄰華州人登正德丙子鄉薦授扶溝令縣故有大猾善結  
官吏武斷不法輔至有告大猾事者大猾懼罪亡匿久之知輔賢  
來謁謝輔反覆諭導許其自新卒爲善士調靜樂邑多逋稅民皆  
觀望不肯先輸輔至應期稅辦遷廣平通判理冤釋枉廣人尸祝

華州

志



雷子堅綏德州人正德中舉人知廣州賦性剛介廉潔勤敏不畏強禦值流賊劫掠繕城池治兵器賊見有備遂引去民賴以全因抗論將帥失利當路惡之遂落職將行出所貯金幣於官其清潔如

此

綏德州志

牛斗字應宿朝邑人正德時登進士嘉靖初官兵部員外初世廟詔革冒功武職若干人無何夤緣求復當軸秉樞皆受賄爲與助獨畏斗梗正懷千金不敢入秉樞諷司務喻意斗不可乃召斗款曲爲言當國者行有美秩酬若矣斗曰壞國紀而得美官斗不爲也秉樞怒幾欲培之斗因移疾不視事尋出知萊州府又忤權貴罷歸人咸惜未竟其用云

同州志

管楫字汝濟咸寧人正德中進士授刑部主事陞吏部文選郎中能以清苦自持歷任山東巡撫整肅官方甫五月齊魯翕然稱治以



母老告歸行李蕭然圖書外別無長物

賈志

白宗舜字明廷清澗人以舉人知蒲州蒲素多豪右宗舜一介不取

禁絕干謁嚴革諸弊猾吏畏服尋調夷陵亦有惠政

賈志

惠儒長安人素行清介正德時以舉人任兗州通判持已甚廉執法

惟公有中貴斃民命臺司下儒理之中人懼餽金一鐔覆以醬儒

即發其事竟置於法陞同知河間俸給外一錢不取致仕歸

長安志

李東藍田人正德丁丑進士任丹徒令存心仁厚泣政廉明時武宗

南狩中外洶洶奸民乘間爲奸詐稱乘輿至東疑其僞執而訊之

寘重典召爲監察御史巡方江北兩川皆以威稜著

藍田志

王朝塗朝雍弟正德丁丑進士令三河權璫張銳者縣人也前令皆

先謁跪而獻贄朝塗獨不爲禮銳怒囑冢宰罷朝塗官選司以其

廉正固爭之調鹿邑值沈邱盜起守城有功陞知宿州

朝邑志



李蘭字秀夫華州人正德丁丑進士授戶部主事賞軍宣大宣布朝廷德意軍士感泣後屢管易州保定等處倉又督理永平山海薊州等處糧所至弊絕風清轉員外郎郎中時稱蘭爲鐵郎中出知重慶府察民隱戢豪右一郡稱治

華州志

劉倫榆林人正德己卯舉人知山東定陶縣值流賊劫掠郡邑所過殘破倫先期繕城練士賊薄城倫躬提枹鼓破其攻具城賴以全又均徭役勸農桑息爭訟興禮讓不二載縣以大治終戶部山西

司主事

延綏志

穆相字伯寅三原人正德辛巳進士授沂水令兩遇大盜降之歲饑煮粥給食所活甚衆擢浙江道御史巡視東城權貴斂手勅巡三關築隘口四百五十七置器械三萬餘斷囚八百餘案巡按山西開沁水以通溝洫又疏清源太原渠招降青羊山巨盜復巡江西



以勞成疾卒

西安府志

劉邦禎字兆吉華州人以歲貢選爲通許縣丞值巨盜高寵作亂知

縣段某惶懼成疾邦禎曰事誠在我乃設策勦平之事聞擢曲陽

令會武宗南幸官民驚惶邦禎諭以事上之義隨宜供應調蒲江

令蒲素奸梗難治邦禎蒞政嚴明民罔不服以老歸

華州志

文清字潔之醴泉人監生任射洪教諭人材輩出鄆藍作亂保障有

功

馬志

宋惟忠字守正安塞人正德中以監生任新都簿禦賊有功民立生

祠陞知徐溝政平訟理吏民畏服

馬志

張偉米脂人監生正德中令邯鄲廉勤幹濟百廢俱興時薊盜攻畧

城邑偉築城爲守禦計城西沁河歲患衝激偉導使別流建樓橋

築墩臺不踰月事竣寇至環攻不能克邑賴以寧

畿輔志



秦登字允升咸寧人嘉靖元年中鄉試選昌平學正嚴立課程作興士類擢同知鳳陽淮決築堤造梁於泗工役之費皆所自措會歲饑請賑全活甚衆尋補四川順慶肅清軍政陞崇王府長史以輔導自任告歸卒子可久字孟徵舉嘉靖丙午鄉試謁選揚州通判攝江都事廉明勤慎訟獄稱平陞知濱州盡心撫字不避勞怨濱城壞可久爲修築之屹然保障

咸寧志

弟可大字仲容嘉靖中進士

授東光令丁外艱起補光山令以績最擢兵部武選主事歷員外郎考察武臣不避權貴尋陞山西叅議擢四川副使兵備建昌值土寇沙氏亂撫鎮主勦可大主撫竟以撫定陞山西行太僕卿兵備寧武尋致仕可大幼岐嶷長而穎脫博通五經尤長於詩弟可貞字秀章萬曆中進士爲富順令亦有善政

賈志

盧紳字汝佩咸寧人嘉靖癸未進士知遂寧縣有水患築堤植柳水



害永消累擢湖廣副使撫治荆南荆南界連川貴諸蠻構兵連歲  
上怒下守臣會議紳曰蠻性蠢爾若繩制太嚴恐生他變不若開  
諭利害俾罷兵息民足矣從之兵遂解陞江西叅政瑞州寇起單  
車諭散其黨擢貴州按察使衛指揮貪暴激變軍士連結諸蠻爲  
亂紳至執首惡餘悉宥之進布政使改順天府尹時有勲貴奪畿  
內民田數百頃關說京兆紳力拒之擢戶部侍郎總督倉場兼理  
西苑農事清查積貯餘米二十餘萬石以裕國儲拜南京戶部尚

書

賈志

閻溥字克周興平人嘉靖癸未進士授刑部主事時光祿崔卿子殺  
人其子故宰相甥曲爲請溥謝曰僕與相公均有官守朝廷法顧  
爲相公屈耶竟論如律出守保定路當四衝兵衛雜揉豪右戚畹  
武斷漁獵溥一切持以法毋敢肆者癸巳大同構變朝命勘撫溥



揚威布澤反側向化晉副浙臺以爲郡時與臺使抗禮捃摭舊事

論罷遂不復仕

賈志

秦世顯字子修涇陽人嘉靖癸未進士任饒陽知縣饒地瘠訟繁多盜世顯裁決如流案無停牘會有大盜入境世顯親獲渠魁一人餘俱生擒而還自是境內無盜真定有寇患世顯禦之一戰而平

年二十三卒

西安府志

王良臣寧羗衛人嘉靖乙酉舉人庚戌俺答圍京師以郎署督餉九門著才能出守澂江遷運使錙銖無染正直有聲又同里吳承芳

官山西副使亦清介有惠政

賈志

宋宜鄜州人嘉靖丙戌進士授行人奉命祭藩藩餽送悉却不受擢監察御史有中貴不法疏論其狀忤旨下獄未幾上悟擢真定太守郡事委積決斷如流驛遞出納前守多私其盈羨宜令州縣自



支歲省萬金陞四川叅政歲饑請賑活數萬人白草番作亂宜督兵擒巨魁降其衆捷聞賜銀幣致仕卒

賈志

杜世爵涇陽人嘉靖戊子舉人任內邱知縣會世宗南狩供應孔繁世爵俄頃立辦擒刁頑呂崇仁李政等殺於獄築金堤官莊清修尹村四堡置錦繡堂鶴度嶺二口民倚賴之

畿輔志○按陝西及涇陽志俱作世爵畿

輔志作世鬱者誤

趙瀛字文海三原人嘉靖己丑進士初授章邱令歲饑賑濟全活甚

衆除凶緝盜民賴以安擢知嘉興府轉兵備易州道邊功甚偉遷

山東叅政歸里時囊笥蕭然

賈志

瀛知嘉興府事政尚剛毅多所興

革疏濬城河以其土運之南湖建煙雨樓時田多逋糧吏緣爲奸

乃分田地山蕩二則賦額均平迄今賴之

嘉興府志

馬書林字子約高陵人嘉靖己丑進士初授河南輝縣令申減上稅



田三百餘頃改洩久潦地爲田五百餘頃輝民頌德有江西富民王冠者縱慾爲惡買人童男女合藥事發王冠求書免囑者無數且饋千金林一無所受寘之法陞河南汝寧知府時豪宗暴虐書林申革崇王府長史軍校充發邊衛者二十餘人汝民以安轉四川保寧府申減絲綾之累陞四川按察司副使未任卒

高陵志

杜坤鄜州人嘉靖辛卯舉人判嘉興府興利除害勸課農桑海鹽大豪賈植恃財殺人坤捕擒按治如法民悅作洗冤記

賈志

馮友字益卿長安人夙性孝友篤志講學學者稱兌泉先生嘉靖甲

午舉於鄉歷任岢嵐知州築城濬濠邊圉以固調忻州以募商飛輓繕修邊垣有功賜白金文綺加俸二級晉保定府同知時嚴嵩當國其僕嚴年以侍教生刺來謁友見刺即答其人年恚喉墮院

吳某論歸

賈志



左思明字五河耀州人嘉靖甲午舉人爲永城令修城建橋設倉改

驛立太邱書院以教士政績卓然陞知趙州

耀州志

王宗堯字汝敬由天性字純夫俱富平人嘉靖時舉人宗堯知郛縣

興水利設社學天性判合州擒巨盜勸農桑蜀人咸德之

富平志

廉傑城固人嘉靖中舉人知沁州能以至誠孚衆一時教化大行冀

南翕然稱治子汝爲以舉人知應州守正不阿革除夙弊應人爲

之立祠汝爲子第以進士官按察使

城固志

惠之翰字伯君清澗人嘉靖中舉人官大同通判時雁門糧餉蠹吏

多侵漁之翰至悉發其奸寘於法飲冰茹蘗遇事敢爲不辭勞怨

嘗曰苟利於民此官可棄何恤乎人言子承芳以舉人司曲周鐸

教士多成材終戶部主事

延安府志

楊九澤字子德華陰人嘉靖中進士爲洪洞令擢御史巡按浙江



奢費革火葬嘗疏請於漳州設重臣及增設月港縣治時稱碩畫

華陰志

孫曷榆林人徐衡鳳翔人並嘉靖中舉人曷知陵縣衡知高唐州時齊魯大飢餓草載道兩人各捐俸賑之全活無算曷後官南京戶部郎中倭犯南直輸運畫策我兵以是克捷衡後知應州亦值邊警守禦有方城不得陷

賈志

胡昂字文宿扶風人嘉靖中舉人任開封通判治才明敏能摘伏有妖僧善幻形以行污穢昂剖其奸遠近驚服遷松江倅見婦人在江上哭而不哀密察之乃繼妻潛隕前室子而詐哭也即逮訊正法

扶風志

崔璉字宗商高陵人嘉靖中貢生爲崇慶州判抑豪強解冤誣常祿外毫髮不取告病貧不能歸上官爲給路費始還里

高陵志



王三聘字夢莘盩厔人嘉靖乙未進士授大理評事讞獄多所平反擢僉事河南督屯政兼理驛傳時南陽諸屯半侵於豪糧數影射一三聘釐剔一清郵遞供應困絀三聘規畫節省改僉事四川會都蠻猖獗三聘主安撫同事者議不合遂歸里囊箚蕭然

盩厔志

薛騰蛟字時化渭南人嘉靖乙未進士授長治令均賦役恤鰥寡政平民阜累遷四川僉事分巡川東卿尹錢若愚貪墨無顧藉騰蛟即按劾之大盜銅梁朱洪受太平袁廷佐咸肆行劫掠負固不下騰蛟擒勦殆盡征苗之役騰蛟監蜀兵入楚轉饟以時人人用命俘斬七百級捷聞賜白金文綺陞山西叅議分治大同大同遭悍卒變當事者務爲姑息騰蛟以嚴治之一軍肅然已遷副使遂歸不復仕

渭南志

張紹芳字孝先鄠縣人嘉靖丁酉舉人初仕襄陵高平教諭正身率



士遷沁水令廉介自守請託不行調五臺築城禦寇修學育才民有張青天之謠比倅順天名譽益著冢宰張元洲知其賢即擢河間同知嘗攝府篆庫吏進羨餘三百金叱去歸里囊橐蕭然

鄂縣志

南逢吉字元貞嘉靖戊戌進士授禮部主事太廟明堂諸大禮屬草多出其手出知保寧力戢奸宄悉與更始暇則萃諸生之雋者督教之一時得人爲盛民有爲盜誣者十一人寃十餘年莫能白一訊雪之陞副使備兵鴈門慨然曰陣法不習匪我制敵敵實制我今之邊弊有甚於此者乎於是諭三關將士如令甲習之又數巡行三關外軍聲大振條上備邊便宜五事多觸忌諱執政不喜格弗上及考察用飛語罷官

賈志

高謙字孫益榆林人嘉靖戊戌進士知涑水縣清謹自守歲滿擢崇州知州及卒州人撤市巷哭貧不能歸州民合贖始還里

延綏志



喬世寧字景叔耀州人嘉靖戊戌進士授南京戶部主事以僉事按川南時行郡縣獎良罰惡陞湖廣督學所擢拔無愧顏庚戌爲河南叅政有詔募兵河南世寧部署嚴整時裁損供費諸應募惡少多道亡且擄掠獨大梁士卒無一不法者尋督餉小灘小灘商賈閉糴轉餉無由輸官因即其直以爲利世寧令轉餉者分糴旁邑奸商失利而民甚便之擢四川按察使以憂歸

賈志

王邦憲字後泉耀州人祥符令王志孫嘉靖庚子舉人初授徐溝令政聲茂著陞萊州府通判除舊守魚戶之私去劉瑾蜡稅之苦萊人頌德建祠憲文章氣節關輔稱美子孫爲紳士者至三十餘人而國圖尤爲顯赫年八十四卒

賈志

長子國字伯禎中萬曆丁丑進士以庶常授浙江道有權要占民田數千畝悉核實歸之督學江南首拔士如朱之蕃顧起元等皆蓋代才復掌河南道管京察備



櫬陳封事劾權貴直聲震朝野乞歸終養尋起山西副使時中使  
勢焰薰灼窘辱寮佐國獨能開陳大義頓令折服由是大僚方不  
庭謁宦官擢兵部侍郎巡撫保定歲荒賑饑全活甚衆大盜劉應  
第等聚衆倡亂國親討平之絕魄遺肅屬吏嚴保甲廣積儲善政  
犁然晉陞蘇督疾作乞歸圖邦憲第三子萬曆丙子解元丙戌進  
士任翰林典試福建多拔奇俊歷陞吏部右侍郎以讒去起禮部  
尚書泰昌登極特召起用會帝崩憂危朝事歸家病卒圖生平立  
朝不耦邪黨經筵多所啟沃纂修國史率皆實筆朝野重之庚戌  
拔俊得人稱盛人擬之爲歐陽永叔司馬君實云謚文肅耀州志  
李應奎字文煥白水人嘉靖庚子舉人知陽信縣以嚴明爲理境內  
肅然值秋水沒田應奎履畝號泣自責百姓皆感泣入春米價翔  
貴奎詣中丞請發倉以貸中丞意難之奎力請得發民賴以生水



志

趙忻字子樂盩厔人嘉靖辛丑進士授長洲令長洲繁劇難治忻拊恤備至獨於黥吏按罪無少貸晉刑部郎中出守保定時值歲祲忻開倉賑之備兵冀州飭器練士隱負長城之望治兵山西巡撫應天所至務鎮靜持大體汚吏皆惴惴矜名節

盩厔志

師桂字近溪臨潼人嘉靖癸卯舉人任青州守治礦盜決梗獄人服其威明時倭寇犯浙檄令監司守令部六郡良家子往禦之桂毅然請行親履行間矢石弗避總督胡林疏薦其才遷守大同奏豪宗不法者九人咸寘於理其歲祿匱乏者以時給之一時豪橫畏且愛焉

賈志

任璜字伯玉臨潼人嘉靖甲辰進士授成都府推官監守倉糧時月俸皆倍支致倉曹多累璜釐其弊出納如數有松潘指揮坐監守



盜應抵辜或爲乞貸許賂以金璜竟寘之法時當事要功者請加兵瀘叙等衛璜按其迹實未叛乃力請罷師後徵苗兵備邊無不奉命造釁者遂被劾去璜得褒擢任給事中以母老乞歸養卒

兄佩字鳴玉達州學正有經濟才

臨潼志

南軒字叔後渭南人嘉靖甲辰進士除刑部主事改吏部較京闈試

甄拔皆時俊擢四川副使遷山東叅議墨吏望風解綬後以老致

仕

賈志

子憲仲字子章萬曆甲戌進士授棗強令邑城卑薄憲仲修

築遂稱保障抑豪宗發隱盜斷武邑寧晉疑獄利賴甚溥丙子秋

奉檄按邊遍歷紫荆等關凡論斥堠修廢軍餉羸縮將領賢不肖

悉當碩畫以勞卒

渭南志

嚴天祥字叔善朝邑人嘉靖甲辰進士知絳縣絳有毆人股致死者累檢之股骨無他天祥察二股骨形色微異嚴訊之乃吏忤受賕



潛易他骨囚具服撫按有疑獄下天祥治之無不得徵拜監察御

史苑洛集

趙仕字丹山膚施人幼負才名與兄瑤嘉靖丙午同舉於鄉知武鄉  
邑半石田民苦貧瘠仕盡心撫恤清賦均徭懸墾田之令民乃樂  
業又倡立文社親爲訓課文風丕振致政歸行李蕭然囊殮幾不

給延安府志

張光孝字惟訓華州人嘉靖丙午舉人授西華令剔蠹興利務與民

休息西華舊爲土城四面受水日就頽圯光孝易以甃三月告竣

有王生者爲廝養卒所誣臺司已成獄光孝知其誣力出之民大

悅服光孝性孝友能文章採華摘藻下筆千言立就著作多行於

世子士鵬密雲教諭士鯤沁源令皆以文章德政世其家

華州志

黃宸字思瞻咸寧人嘉靖丁未進士授衛輝府推官時鄭府以諫阬



人... 而逆上大怒命三法司擬之法司微展訊問

獨其... 工部居淮上會兵變宸通商僨運開屯穀餉吏

... 臣知彰德府尋致仕咸寧志

一正牛... 嘉靖癸丑進士授戶部主事歷遷山西叅政

駐汾陽時雲朔多... 一正村民振伍卓有方畧歷順天府尹振刷

綱紀釐剔奸蠹部... 肅清尋以病免一正性貞毅不為威利所移

尤篤於孝友渭南志 字成玉一正子萬曆乙未進士授東光令興

利祛蠹調翼城翼城民疲俗悍琚均徭薄賦慈愛有加擢水部主

政慎出納革積弊以勞瘁致疾卒賈志

重字汝器渭南人嘉靖癸丑進士歷固始仁和滑縣令以才著各

累遷懷慶郡守擒盜魁李應乾尋陞河南叅政分守大梁復以擒

巨盜權僉都御史巡撫上谷終兵部右侍郎渭南志



字從教字伯勉同州人嘉靖癸丑進士性重厚質直知涑水縣調歸

安時不有倭警從教修水關置邏船倭不敢犯遷戶部主事轉郎

中督餉雲中出納惟允陞知河南府改除夔州未發卒

同州志

與安人嘉靖乙卯舉人任山西長子縣知縣秋毫不取迺冬著

書未楊民有以屬襪進者正色曰若墨我叱去宦歸親識至以

問其腹大噓曰官歸不問官問鎗吾豈以鎗官耶問者悅服

字世達涇陽人嘉靖丙辰進士授戶部主事歷陞僉都御史巡撫山

東督漕河以寶應湖險惡歲漂舳舻無算請開越河以殺水勢為

百世利晉南吏部尚書甄汰悉當後入為刑部尚書多所平反時

儲瑞勢張甚世達疏先治禁近供事徐正首惡以杜禍源已為

都御史申明憲典俾巡撫無得以問餽相遺一時苞苴盡絕卒

都御史申明憲典俾巡撫無得以問餽相遺一時苞苴盡絕卒



肅敏志

楊兆字夢鏡膚施人嘉靖丙辰進士任紹興知府以卓異遷密雲叅政著邊功晉都御史巡撫順天嚴烽燧時訓練陞刑部尚書歷兵部尚書禁衛皆虛籍兆簡稽不避權貴軍政肅然遴選將士多得其用

延安府志

黃九成字引南城固人嘉靖丙辰進士授戶部主事陞員外監稅崇文門盡汰溢額以清慎著名尋陞郎中摧蕪關稅務以餘金充上額二萬陞臨清道副使告歸

賈志

張士佩字玫父韓城人嘉靖丙辰進士授紹興府推官擢御史每疏入肅皇輒報可按山東調停海運安輯遼左流移咸稱碩畫遷守嶺北土寇葉楷作亂士佩諭散之有盜當三省之交嘯聚百年士佩議立州於程鄉興寧安遠武平四縣間俾保甲互制盜遂息



山西叅政汾水汎濫沒民田士佩築猪城濼以時蓄洩遂成腴壤  
持憲東省齊東數盜者十餘家廉得實殲厥渠魁盜爲之盡晉右  
藩以水災請除魚臺諸邑寄養馬匹歲省民財巨萬總晉藩凡所  
解稅不啟封即行轉解開府西蜀奉勅丈地盡釐隱詭重賦者緣  
是得蘇長官司土舍阿祭行萬金賄謀冒襲士佩治罪不少貸天  
全司土司楊時春以庶孽謀襲殺應襲者作亂士佩生擒之永寧  
宣撫司土婦奢世統爭印讐殺互奏廉得世統與邊目奢進忠苟  
合乃暴進忠罪許自新仍歆以厚賞進忠懼陰爲我用世統遂帖  
然就勘卒正其罪又董卜烏慮冉維屏稱兵作亂俱以計討平之  
成都兵戍威茂監司發行糧稍遲遂鼓噪士佩急命啟門呼入曰  
此非副使所得主吾當給之衆遂散致仕歸嘗自誓云吾有三事  
在官不取贖鍰遷陟不用賂賄居家不行請託終身不愧斯言



據濱撫蜀時有成都同知張元善者亦韓城人土司構亂元善入幕參贊軍事謀畫周詳論功擢順慶守聽斷如神發冤釋枉一郡

稱治

韓城志

朱承殷字伯賢鳳翔人嘉靖戊午舉人授沔縣諭嚴課文藝寒士不能婚葬者每周之陞通山令薄賦省刑有兄弟爭產數年不息諭以大義竟相遜讓有凶豪數不法前令皆姑容之遂爲所制承殷至寘於理惡風遂化

鳳翔縣志

劉時達金州人嘉靖戊午舉人知大竹縣時寇賊嘯聚達密布方畧捕獲凡二百餘人奸宄至此斂手

四川通志

朱耀字徵庸渭南人嘉靖己未進士授安邑令政在惠民不阿上官以執法左遷廬州府教授正己率士累擢南戶部主事推稅杭州往司稅者以羨多爲能擢獨減如額尋調戶部主事推都門稅請



託盡絕歷遷員外郎中鄖陽郡太守政務大體戒苛察鄖人尸祝

渭南志

范燧字以木邵陽人嘉靖己未進士累擢河南叅政居家孝友歷官清約裁權金通滯漕擒妖僧除大猾宦轍所經人咸頌之子湜宰

岳陽有能名

賈志

侯職榆林人嘉靖辛酉舉人爲介休教授擢山東鄒平令歲饑盜起職捐俸賑濟躬詣盜所諭以大義羣盜立散遷大名府通判管宣府南路事時代藩占屯田地七千頃職力爭得還宣大屢警至是挾增馬價督撫知職才檄董互市職兼示威信邊患始弭尋致仕

歸

延綏志

王學古字子獲朝邑人嘉靖壬戌進士爲壽春令調廣宗以治行第一擢判順天府尋遷刑部員外郎具獄多力爭平反無算調戶部



遷郎中清苦自砥忤中官出知漢陽府地衝疲又多盜學古文田  
均役盜息民安一方稱治學謨字子楊學古從弟嘉靖癸丑進士  
初知太谷縣持已廉明令行禁止後治兵岢嵐嚴禁冒功殺降於  
河塹築邊牆益築老營堡及賈陀乃河二堡俺答將以十萬衆入  
邊學謨知三關不足特建議請隔鎮兵爲犄角督撫不聽遂陷石  
州坐謫戍萬曆初陞山東叅政政績茂著告歸卒

朝邑志

鄭札字伯文澄城人少有志操負笈馬文莊之門砥礪行業嘉靖甲  
子舉於鄉起家學博轉信陽尹期月大治以憂歸起補新樂裁冗  
拊罷不勞而政舉以高第入爲戶部主事出知夔州皆有能績陟

淮陽鹽運使刻蠹惠商二年卒於官

同州志

劉自化字伯時高陵人嘉靖乙丑進士除戶部主事司崇文稅令商  
各以物自占寬算緡額商困大甦司草塲却千金饋司太倉銀庫



得前盜臣主名奏治之大司徒以漕糧過期遣自化往督自化并道抵淮布憲令漕艘爭先至徐城河忽夜決自化披衣大呼巨艦載土塞城城完漕糧無恙除岳州臨湘故無城取關市賦成城民不告勞平江盜出沒吏莫能討自化入境擒渠魁散其餘黨改守登州築城如臨湘青登萊三郡逋賦至萬上書陳之司農蠲逋稅而奪其俸自化大喜曰以吾俸省民脂膏吾所受贏矣兩調山東浙江都運使俱以廉稱遭父喪歸遂不出子復初字貽哲萬曆癸未進士授戶部主事調兵部時有事朝鮮大司馬欲以封貢羈縻之復初力言不可大司馬爲之屈出守上黨歲大饑民多轉徙時苦地產之征乃會計庫藏餘金補之又省站銀歲千兩以牛種給民墾田萬餘畝積粟至二千石郡乃饑而不害尋以飛語降廣東市舶提舉粵有稅銀五十萬素不及額中使持之急復初反覆開



說歲止賦十二萬擢淮安同知後持憲川瀘川人曾良弼唆土官  
攻筠連城復初計擒良弼父子斬之土官奢崇明與雷安民關復  
初遣人諭止之尋勅駐陽和順義與索囊陰相結七年不貢復初  
至築城堡練戎馬遂通貢如故調薊門陞太常告歸

賈志

王庭詩字言卿華州人嘉靖乙丑進士授內黃令政聲甚著時王元  
美備兵魏博有三郡一令之稱歷藩憲荆楚多異績

賈志

趙應龍字時化涇陽人嘉靖乙丑進士授伊陽令伊賦輕重不均應  
龍以九等定民賦賦乃平調臨淮有尸浮水不行應龍密廉得三  
人携一婦同舟者收鞫之乃婦殺其夫而投諸水也論殺三人政  
治赫然江淮間行取湖廣道監察御史按屯牧事減騶從薄供億  
條奏數上皆關治理惜未竟其用而卒孫虞佐萬曆丙午舉人歷  
官汝州兵備居官有廉操先任揚州府時民稱為趙不要云

涇陽志



韋文英字德華嘉靖中舉人知陽城縣有大猾素凌轢其官稍不如意則訟陷罷之文英捕按伏法境內肅然同時宦績著於三晉者有鳳翔何廷琦南鄭毛一鳳汧陽張恕華陰吳講城固方策洋縣紀會廷琦大寧令力行教化盜賊悉爲善良一鳳蒲縣令加意人文稚魯悉知弦誦恕任平遙聽斷大獄曲盡情僞講任萬泉編審丁戶破格開除策官靈邱革耗羨却餽送會任翼城撫凋瘵恤荒殘咸稱良吏

舊志

張思靜字伯安同州人祖績官容城令有惠政思靜嘉靖中舉進士授翰林改禮垣嘗劾奏英國公某鄔都尉某不法事權貴憚之出爲四川叅政督採木之役官民樂其不擾有汪四者倡白蓮教稱亂思靜用計擒之丁艱服闋再起分守河南擢觀察使以病告歸



馬永亨字健初韓城人孝廉司訓房山正己陶士即陞房山令性直  
質嚴取與常祿外一無所染真心實政人不敢干以私改河間同  
知嘗三攝府事視羨金若浼遷應天治中監織造往例有樣段永  
亨皆却之陞常德知府告歸自司鐸至太守歷官三十年清節始  
終不渝

同州志

張鏞字伯始武功人嘉靖中進士令曲沃有豪紳占丁役罄一里歲  
辦數百金鏞力裁之遷大理寺副數辦疑獄多忤權貴終蜀府長

史武功志

康河字汝修德涵弟武功人授戶部主事理鈔關通商裕賦出守充  
州培本抑末植善布惠以循良稱移守廣西殫力効職不畏難不  
辭勞不避嫌不規利以是馳聲亦以是買怨再徙贛州遂移病歸  
里

武功志



米輔字良佐臨潼人由太學生判隰州督理糧餉纖毫不染教民興水利歲收稻萬餘斛又有溫湯者州及屬縣分耕其地州民多頑梗抗賦聞催科者輒持兵相向輔至諭以大義自是輸將恐後及

歸吏民遮留載道

臨潼志

史載民渭南人初任昌平委吏先是爲吏者率以虧折逮捕去載民約已勅法報竣後粟豆羨至千三百有奇後任羅山九里關巡檢有豪強恃山險窩盜載民設計擒獲羅令某素怨邑中富人誣以通盜當道檄載民訊其事被誣家持金爲餽載民卽唾叱擲出鞠訊虛公誣者得釋有潘某者私人妻而夫被殺獄經年不決復下載民潘以金杯白金綺縠托隸役爲壽載民笞隸幾斃潘泊婦咸

正法

渭南志

張士奇字秦麓宜君人痛親蚤逝置廬荒隴日依松楸間丁卯恩選



授永清令潔已愛民纖塵不染擢守通州是時貂璫肆斂諸中涓賄賂公行士奇力拒之檄罷運木車歲省民費三萬金修築舊城疏通運河勞績大著上賜璽書金爵二蓋異典也擢開封郡丞盡心河防中州得免水患以疾告歸祀名宦

賈志

李時萼字茂夫洋縣人隆慶丁卯舉人初任郿縣教諭教士有法陞長沙推官佐刑明允擢御史巡按遼東多著勞勩以忤時貴補夔州知府陞山東副使督學關東所至美政著聞取士尤稱得雋

賈志

王繼祖字克紹咸寧人性孝友隆慶戊辰進士授兵部主事監稅山海關謝絕餽遺陞武庫司郎中諸司支費甚繁繼祖謹出納明簿記陞河間知府政聲爲畿輔最以直道不容罷歸薦起補南陽知府抵任當歲歉流移載道繼祖多方賑濟全活數萬尋陞副使告

歸

咸寧志



張世烈字葵亭延安衛人隆慶戊辰進士仕開州牧刑清政簡有古循良風轉戶曹出守青州表率僚屬清操益勵晉左方伯終太僕

卿延安府志

羅奎字文光淳化人隆慶戊辰進士任上蔡令有羨金五百奎爲募夫繕城著爲令田糧久不均奎履畝勘定積弊一清邑故多豪猾悉按捕論如法以治行累擢兵部郎中出爲萊州知府會歲祲孳流載道時府治城堞多傾圯奎曰古有興役濟饑者非其時耶乃募工修築量食支給城工速竣而民賴以存又杖殺土惡擒治礦首洗誣理枉鋤強扶善循政難以悉數未幾以讒歸

袁正撰墓志

薛亨字道行韓城人嘉靖辛酉舉第一人更十年成進士授戶部主事督餉寧武時戍卒築堤請倍給餉或議加賦亨不可裁甲馬芻秣之溢額者畀之著爲令遷刑部員外郎擢山西提學僉事教先



德行而後文藝遷山東少叅督泰山香稅屬歲大侵市粟賑饑市  
牛助耕遷楚副憲理屯鹽水利正經界繩兼并民困大蘇遷四川  
叅政治涪大修學宮訓涪士民俗爲丕變遷山西按察使治兵昌  
平尋徙汾州強宗聞公來凜凜受要東平停獄數十百人置學田  
養士遷河南方伯汰筦庫宿弊中丞某薦於朝而晉人議其後坐  
罷歸

李維楨撰傳

陳宣永壽人萬曆初年由進士知河南府留心學校加意民瘼興修

渠堰爲一時惠政

河南通志

韓希仁字孟元涇陽人萬曆癸酉舉人授高密令勸農給種三年積  
倉穀三萬餘石荒歲民賴以生陞知潁州平康中有陰殺游子弟  
者具首子弟殺娼自刎希仁曰即具首者殺之也竟抵死潁民咸  
服其神丁艱補濱州濱有巨盜爲院司役或首之希仁佯叱曰安



有公役爲盜者乎故毀其狀密報院司請付法賊黨遂絕陞襄陽同知清軍伍稽尺籍覈虛糧積弊一清督修老農堤以捍水患尤屹然爲江漢保障云

涇陽志

郭如魯字唯一朝邑人萬曆癸酉舉人教諭平遙歲荒盡捐廩米以賑丙戌成進士知曲周縣俗健訟如魯以德意感諭訟者日寡遷同知東昌府攝臨清廉其巨猾剔治如法州故舟車算賦地易爲縑染如魯嚴禁內外不使關通廉聲大著以病乞歸

朝邑志

張邦敬字簡甫韓城人萬曆癸酉舉人任嵩縣令擢河南郡丞鹽法屯政多所整飭陞叙州知府叙荒裔文教殘缺邦敬爲刊四書五經於府學安奢土司叛亂大兵勦之邦敬理餉有功陞安綿兵備副使調雲南金滄兼攝督學革土番私貢之金勅營伍時閱之制號一方保障陞貴州左叅政歸里

韓城志



晉臣字孟蓋長安人父爵官西城兵馬司勳直有聲臣萬曆間貢生  
任光祿寺署丞狷介自持常俸外纖毫無所取人咸以廉吏稱之  
調元臣從孫爲館陶令救荒恤貧多所全活以守城功陞兵科給

事中

賈志

張養才字汝才同州人萬曆中進士爲行人三奉使藩國不受餽遺

轉吏部主事歷四司秉公佐銓爲冢宰所倚重終太常少卿

同州志

翟事心字鑑寰朝邑人萬曆中舉人爲保昌令政治一以誠實不欺  
爲本民胥化之喜拔才雋以道德相砥礪陞東昌通判

朝邑志

常澄字希憲蒲城人父廷奎官青州同知以威稜著澄幼即好學舉

止莊嚴由進士歷臨漳東明二邑令惠愷有聲擢吏部主事嚴禁

餽送杜絕請托人無敢干以私者予告歸

蒲城志

吳永圖字維懷韓城人萬曆癸酉舉人爲榆社令邑素凋敝永圖極



意撫循課士勸農恤孤拯弱辨冤獄發誣枉榆民稱為吳青天編  
審催征尤愜輿情素性耿介不善逢迎當事者忌之中下考居榆

三載行李蕭然

韓城志

葉期化寧羌衛人萬曆癸酉舉人任汾州推官為政有風裁且敏於

聽斷多辯冤獄人服其明

寧羌志

雷大道字行卿朝邑人萬曆癸酉舉人知廣陵縣時大侵捐俸以賑

墾荒千餘頃遷通判兗州署府事却常例數千金以母老告歸

賈志

郭性之字鹿坪華州人萬曆甲戌進士官河南布政使惇大寬仁用

心精密民間疾苦無不周詳決疑獄籌兵餉區處悉中條理致政

歸人咸歌思之

華州志

陳諫字直卿華陰人萬曆甲戌進士為內江令素履小心精明端亮

猾胥莫能欺擢戶曹轉餉榆林以勞卒

華陰志



李士達字伯順三原人萬曆甲戌進士授中牟令擢南京江西道御史謇諤著聲忤江陵出爲四川僉事會天全黎州永寧三土司亂平之擢叙州叅議征賊有功歷陞四川布政使管川東事單騎往征流賊事甫定以艱歸遂不復出

賈志

王致中字懋和寧羌衛人萬曆甲戌進士任兵部主事因清直取忌謫河南知事尋陞靈寶知縣靈素苦衝疲致中救荒恤驛靈人感之祀名宦

賈志

馬樸字敦若同州人萬曆丙子舉人授景州守勤幹嚴明摧使王監橫甚景民被逮株連數百人民大譁樸爲數稅使激變罪諭譁民解去順永張監議加稅河間上官已許樸格不行歲荒疫煮粥醫病安流移贖子女全活甚衆以憂去服闋補易州擢襄陽守積穀備荒倉庾完實復堙占塘百二十區修南漳堰得腴田若干頃革



襄樊均州光化雜稅後遷滇憲告歸

賈志

聖

張徵音字祚康朝邑人萬曆丙子舉人知山右某縣調河南孟縣作堤以障黃河時稱張公堤又調寶豐政務優閒徵音智畧輻輳有當世才限於資格不得竟其志在山右時城守禦盜用鉦鼓析鈴四物辨方向後遵用之又著論謂地寡者各於其地如地網法半高半下以備水潦不惟田得利且可設險其他設施多類此弟綸音字祚欽萬曆辛丑進士官湖廣副使以威稜著

朝邑志

白希繡字夢山延安人萬曆丁丑進士授魚臺知縣邑瀕河民苦濬

築往往避役希繡喻以大義民樂趨事擢吏科給事中丰裁凜然

出爲叅政陞都御史巡撫山西墨吏望風解組

延安府志

馬協字恭甫同州人萬曆乙卯舉人授廣宗令邑民以賦重多逃徙者協至榜招開墾度地居民村墟復實改新鄭縣縣多冗役冗費



繇賦不均協力爲清理裁抑汰去二千餘緡遷禹州逋負積二十年協履畝度田以次豁免以俸足其額值旱疫協爲賑濟醫藥發倉粟六千石賤直售民民賴以寧擢鳳陽府丞清寇捕盜時屯運久爲累協於屯則議覆荒田時徵收謹委任行改折於漕則議修糧船選旗軍甄運官禁關津稽留嚴吏書需索皆爲一時碩畫遷守辰州辰與苗接境協修築邊牆辰民困於漕木協力請減運生平方嚴剛果自少秉清約服勤茹淡不妄交遊

賈志

李時茂乾州人萬曆乙卯舉人天啟間爲黔中郡守重學校恤軍民值苗衆圍城與民固守多所斬獲後卒於官

貴州志

王嗣美字實之朝邑人萬曆庚辰進士爲太原推官持已廉約聽斷明允擢南戶科給事屢條時政缺失遷山西河東道有豪宗屢殺郡人有司莫敢問嗣美按治如律轉江右糧儲徵發押運夙弊一



清再補河東道拊恤教養曲盡其事遷山東驛傳以病乞休賈志

武紹祖字克光涇陽人萬曆壬午舉人初授濟寧州學正歷遷四川

保寧府知府三巴產茶久爲民患紹祖悉蠲去鹽課故摧井井有  
枯有實有鬻按井而摧無得免者而新井以供他費紹祖獨以新  
井應摧商困大蘇擢兩淮鹽運使卒涇陽志

賈嶼字魯玉渭南人萬曆壬午舉人授襄垣諭文教大興尋令崞邑  
革冗稅墾荒田興水利招流移葺廟學繕城池聽訟公平民以不  
冤條上邊務十餘事著爲令三年移大同通判遂辭歸渭南志

王如皞字允淳朝邑人萬曆壬午舉人授鄖陽同知值歲凶爲分地  
立限以賑再補永平攝灤州却常例金稅璫勢方張請脫其私人  
之罹於法者如皞卒論如律擢知貴陽府經理蠻部方畧輻輳制  
府郭子章每諮訪焉議建貴定縣以增守禦創恤隱局以慰羈旅



丁艱歸起補兩浙鹽運使奏最爲天下第一後告歸

朝邑志

牛應元字兆坤涇陽人萬曆癸未進士初任光山知縣創條編法與民休息勸建社倉積義穀六千三百石有奇時光歲貢葛爲民累應元募匠自織自解光人德之三載政洽民和有產麟之異陞四川道御史按鹺兩浙力剔奸竇巡方應天時值權璫開礦借端擾富室應元捕其黨繩之法璫稍稍戢累遷中丞撫南贛飭武備核將領拔才能禁苞苴立社學暇則坐臯比諸生質疑問難不復知開府之尊拜南大理卿刑部左侍郎予告歸

賈志

文運熙字和一三水人萬曆癸未進士以工部主事摧兩浙木稅力

剔重算商賈爲建生祠擢叅議條海防權宜諸倭不敢犯

賈志

周道直字泰宇臨潼人萬曆乙酉舉人筮仕葭城河水爲患築堤二百餘丈民賴寧居革行戶裁冗役以阜民便俗爲務擢戶曹權稅



潯陽裁船課一萬二千金以蘇商困歸來携磁器數種而已後守  
閬郡值渝州寇變三川震動直親提一旅扼梁山之險以障全楚  
又義激石柱土兵解成都圍方叙功酌庸引疾歸

賈志

崔國裕字仲豐西安右衛人萬曆戊子舉人官泰州知州招流亡墾  
荒蕪擒巨盜捐貲賑饑全活數十萬人子爾進字抑菴萬曆甲辰  
進士授長子令躬行化導變悍俗爲醇良擢御史巡鹽兩浙時議  
增額爾進力爲請命乃如故按福建聞父有疾拜疏侍養即日就  
道後歷戶部右侍郎

賈志

孫崇先字重之扶風人萬曆戊子舉人初任蒙城知縣陞潁州知州  
剔弊懲猾人莫敢欺嘗出郊羣蛙遮道使人尾之去蛙止處掘得  
伏屍知有隱冤拜禱城隍神求雪其事是夕夢一馬負纓入中門  
寤而思之訪有名馬上英者執訊立服衆咸驚異擢貴陽知府

賈志



第五剛先字石嶽三水人萬曆戊子舉人爲贊皇令建學宮崇文教  
立義倉修荒政尋擢金華郡丞告歸

賈志

黃道亨咸寧人萬曆甲午舉人知祁州修文廟立社學飭保甲均徭  
役覈詭派革耗羨未期月而政成歲荒捐俸煮粥救濟招流民開  
渠墾田得數千畝利賴至今

畿輔志

李仙品字雲卿高陵人萬曆乙未進士初知長治長爲潞郡首邑歲  
貢紬疋舊例於道府縣日送樣紬仙品力請革除擢揚州江防同  
知嚴緝江賊累擢川北道會奢賊猖獗奉勅監軍親冒矢石搗穴  
直入剪賊首奢崇明遷偏沅巡撫復討安賊獲勝尋告歸卒

賈志

仙風崇禎戊辰進士巡撫河南值流寇披猖州邑殘毀甫下車百

方招撫湯陰西山土賊蜂起躬履行陣勦滅之城得不陷

河南通志

來儼然字望之三原人萬曆乙未進士爲太和令躬行阡陌勸課農



桑有孝弟力田者表其閭戒飭士子烝烝向化期月邑大治晉兵

部職方司主政

三原志

解經邦字叔憲韓城人萬曆乙未進士授嶧縣令嶧田蕪民徙逋賦

至二萬經邦請捐積逋民稍集即爲建屋市犢具耒勸耕計創官

莊三百二十七間募田二千二百二十四頃入爲戶部主事督海

新二倉節羨六萬歷遷宣府巡撫宣兵驕情經邦按部治之又寧

武援軍肆掠經邦縛首惡八人立寘之法疏請天下援兵所過制

撫得行法上是之加兵部右侍郎經畧遼東且行以母病乞歸經

邦素喜讀易春秋盈虛邪正間數致意焉

賈志

趙可行字子達整厓人究心時務兵法水利無不精詳萬曆丁酉舉

賢書爲中牟令政平治理數月調永城時多盜當事議屯兵以禦

可行請罷兵給民牛種事遂定又歷夏邑即墨二令安邱盜起擢



萊州郡丞捕魁散脅事平調太原督餉寧武招撫叛兵有功陞  
土寇披猖經畧薦之擢守思南可行明於兵事動中機宜未竟其

用而卒

徐開熙  
撰傳

李繼志字繩叔府谷人萬曆丁酉舉人除宿遷令山東饑民二萬餘  
口入境皆賑濟全活之轉西河廳督船却木商常例數千金歷官

兩淮運同

賈志

子國瑞以恩選官戶部員外有廉名

延安府志

邵可立商州人萬曆戊戌進士任山海關兵部主事廉直剛斷加意  
人文建文昌書院購古今遺書以教俊彥嘗三劾貂璫四減關稅  
修鎮東樓工師苦無大木忽海上浮若干至及落成無贏餘者亢  
陽不雨三禱三應士民咸歎異之

畿輔志

劉士璉字翼明三原人萬曆庚子舉人少事繼母至孝天啟中擢司  
刑權璫專恣士璉獨拒抗不附崇禎八年任達州兵備流賊寇成



都官民束手無策士璉總理八門設法扼守危城以全叙功晉本

省方伯

賈志

曰俊字虞臣士璉子崇禎戊辰進士擢諫垣疏通水利

捐金修渠數邑獲利累官密雲總督

三原志

魏良槐三原人萬曆庚子舉人初授冠縣令兼攝邱邑篆先是銀馬

俵解必僉派富戶有一役未終而家產已破者良槐至官買官解

民無包賠之累已未歲大侵煮粥救濟值兵興邑應出牛兵餉銀

良槐軫念饑荒不堪重困捐助以免加派民肖像祀之

冠縣去思碑記

蒲州知州減賦備荒卓有善政

河中頌言錄

遷知平度州州舊有仲哥

莊集因年荒逃竄集無人烟良槐招撫流離人皆復業時有麥兩

岐穀雙穗之徵

平度州集

田有年字立烝扶風人萬曆庚子舉人知江寧縣時魏璫遣內守備

至留都橫甚有年力抗之幾陷不測齊庶人與妖僧瑞光謀逆有



年覺察緝獲之擢戶部主事權兩淮稅輸羨銀於官陞知袁州府

五溪洞蠻叛有年帥師定之告歸

賈志

楊應震華陰人萬曆癸卯舉人歷守衡州持已廉介官俸外一切不

取勸民息訟案牘蕭然以直道不善事上官爲人所中六日敝笥羸馬居然寒士士民號泣追送擁不得行有父老奉盆水以進者

慨然酌水飲之民勒碑以志其事

湖廣志

胡茂字淡明耀州人萬曆癸卯舉人爲漢中教諭值歲饑請尹賑恤

尹弗許茂自出衣物率士庶以賑全活無算竟以是忤尹罷歸

賈志

賈師達臨潼人王永福醴泉人李燦然華州人馬從朱同州人萬曆

癸卯同舉於鄉師達爲平原令勤敏剛斷陞知趙州益乃心民瘼

興利除弊孜孜然惟日不足遷官趙人詣闕請留乃復守趙晉郎

署陞滇南叅政平吐蕃有功永福爲黎城令極意撫循不事操切



及歸黎人肖像祀之燦然爲齊東令爲政先教化而後誅罰一時吏畏民懷風俗蒸蒸日變從朱知黔陽黃縣太平三縣捐介自守飲水茹蘗卒於官貧不能斂

舊志

賈克忠字獻我淳化人萬曆甲辰進士任黔縣令以仁明稱陞刑部主事審錄四川出冤獄一百六十人蜀人至今頌之

淳化志

畦時聘字任衡澄城人萬曆丙午舉人爲延津令請蠲荒地賦民頌其德知渾源州鑿水渠令高下可受溉畝致一鍾遷鄖陽太守卒

賈志

李聯芳字同春朝邑人萬曆丁未進士知涇川時巨盜二紅四紅橫行郡邑聯芳督民兵擒渠魁破散其黨調真定馭吏嚴明白奉至廉遷戶部主事權臨清稅會大旱舟阻商困抗疏謂商亦民也寧虧在官無虧在商尋陞員外郎卒季弟繼芳字蘭畹萬曆癸卯舉



人知三河縣減浮糧三千金長兄時芳萬曆乙卯舉人仕知州亦

有政聲

朝邑志

李采字質軒咸寧人萬曆丁未進士初知嘉定不私羨金尋督餉大

同兵備冀北滇南修理戎政董勸農功俱有成績進江南布政使

抑權璫肅僚吏風裁卓然爲時砥柱

咸寧志

馬之陞字耀寰綏德州人萬曆中進士官大理評事多所平反權稅

九江裁加耗之稅歷荆楚驛傳道募榆林精勇直擣賊巢流寇驚

潰攝廉憲抑奔競崇恬退不法者望風而靡居鄉尤好施慕義人

至今稱之

延安府志

武文達字衷懿涇陽人萬曆中進士授鄆城令勤課耕織聽訟先出

溫語而徐以一言折之民胥悅服歷陞寧前道

涇陽志

趙於達字汝儀盤屋人萬曆中進士授行人擢御史巡按直隸督漕



運時鄒滕盜起運道梗塞於達日夜竭蹶廢寢食者五十餘日漕

事甫竣以勞瘁卒

西安府志

秦鄰晉字汝睦渭南人萬曆中進士授刑部主事多所平反出守順

德慈惠廉明誠心實政以才調真定治亦如順德時陞四川副使

終養歸

渭南志

王于陞字啟宸朝邑人萬曆丁未進士歷官岢嵐兵備道流寇掠代

城親率兵戰敗之獲其渠魁特陞布政使予告歸

朝邑志

趙勉字兢喻朝邑人萬曆壬子舉人授新蔡令新蔡夙號疲敝兼多

盜寇勉躬詣阡陌指授錢鏹民始樂業又剔積蠹雪冤獄卻羨金

卓然以廉明爲治新蔡人尸祝之

賈志

楊國柱字叔堅涇陽人萬曆癸丑進士授泰興令泰興田多濱江坍漲無定漲入豪右坍累貧民國柱以千畝爲一區使不得混淆徭



賦以平歷官兵備河東時賊犯隰州國柱整旅誓師擒劇賊混天龍等斬首千餘級賊乃遁歸里日囊橐蕭然

涇陽志

成琰字鎮寰朝邑人萬曆癸丑進士除鉅野縣調武強興利除害愛民如子遇歉歲蠲俸以賑之遷知夔府清直益著減貨稅置義倉農商感頌卒之日貧不克辦葬

賈志

潘學曾字省予華州人萬曆癸丑進士爲保寧府推官政尚簡靜每行部凡厨傳炊爨之具一一罷之訊獄剖決如流務以得情爲主一時有神君之號丙辰猗寇流劫學曾監軍督餉拮据矢石間遂獲渠魁兩川以寧尋以勞卒

華州志

耿志煒字明夫武功人萬曆癸丑進士授荊州府推官荆俗健訟煒遇訟者必先以大義諭之令歸思三日然後理有一繼母訟前室子者煒曰汝訢先室子彼必仇汝子是汝自戕汝子也令歸思之



遂爲母子無間荆地瀕江漸洋二洲屢被水害煒築堤三千餘丈人得樂業稱其堤曰耿公堤擢吏部以宦監用事請告歸崇禎己巳再起銓衡內勵冰操外營劇務尋陞提督四譯館少卿以母老告歸卒於家

賈志

楊楠字毓秀涇陽人萬曆乙卯舉人授寧鄉令時旱荒又流寇猖獗徵檄無虛日楠處置得宜轉輸不匱以勞疾卒官弟梧字鳳閣萬曆壬子舉人任青州府同知與兄友恭甚篤時人比之元方季方

涇陽志

梁棟字伯材安定人家長安登萬曆丙辰進士知秦興縣倭寇猖獗棟練兵守禦倭不敢犯告終養歸子九賦萬曆癸酉舉人知西充縣疏鹽課之累民爲立石

長安志

寇慎同官人萬曆丙辰進士授刑部主事調工部出守蘇州值大水



歲饑立法全活復捐俸以足漕糧開濱海淤地請減賦額蘇人賴

之陞昌平副使轉山西勦剪毛賊斬獲四百餘級調朔州告歸

賈志

逆璫矯旨逮周忠介於吳吳民知撫臣某以畜怨中忠介欲甘心

焉某感甚挾郡伯寇公爲解民見公輒叩頭呼曰公能治吳人不

能活周吏部耶公用好言勸慰民伏地悲哀久之卒殲緹帥撫臣

乘間幸脫挾公力也撫臣旣免則心甚公得民又內愧益逞其毒

欲旁撫縉紳廉茂之有志節者公又以危詞力爭某稍稍懾益猜

公右諸正人日夜刺公短公廉明無間且終憚公得民不能有所

加

徐汧寇守  
去思碑跋

張鑛字陽宇中部人舉明經知武邑縣居官廉介斂賦不取毫釐輸

解有不敷輒出金以償之時武邑多盜有魏孟祥者都御史猾胥

也庇盜而分取以自潤人弗敢問鑛鞫得實孟祥懼賂當事囑免



又餽二千金鑛正色拒之竟按以法遂忤上官掛冠歸耽玩林泉人皆高之

延安府志

衛先範字象極韓城人萬曆乙未進士令襄陵襄有河患先範造浮梁民稱曰衛公橋又加意作人談經課藝名儒多出其門乙丑擢吏部主事胥吏假印爲蠹先範至首釐之以忤魏璫告歸尋起考功轉文選嚴絕私交毅然以簡賢爲已任時有鐵板釘子之謠內璫馬化龍欲有所托先範峻拒之遂中傷去

韓城志

盛以達字子從潼關人居家盡色養以廕除戶部檢校擢本部照磨摘發冒支官軍俸糧二千六百餘石盡追還帑時有百戶犯科爲薄罰全其祖職百戶暮夜挾金以謝以達叱之陞後軍都督府都事轉經歷剔奸飭法省勾稽免徵輸敝實陋規刮却殆盡所隸十七衛翕然頌之

墓志



張三汲字禹門華州人萬曆中舉人初授天長令以憂歸復除沅陵令操守廉明刑清訟簡多著愛民之政沅民戴之若父母焉賈志

馬逢樂字叔遇三原人萬曆中舉人爲天雄判遷莒州守值大飢捐俸以賑之全活無算終遼州知州三原志

雷翀字翔字邵陽人萬曆中舉人任絳州知州郡中飢饉翀以家所儲粟逾河以濟絳絳人深德之邵陽志

梁廷建岐山人萬曆中進士官大理寺寺正多所平反出守河南廉明仁恕嘗請旨賜程邵二賢後裔爲博士俾供祭祀士論歸美歷川南兵巡道引疾歸值流賊猖獗養義兵以保護岐城土人立祠以報又同縣曹暹天啟中進士任猗氏人感其德巡按江淮振厲風采肅清僚吏尋叅議其寧平晉藩之亂釋久沉之寃及告歸寇攻岐城出夙養壯丁守禦賊驚潰城賴以全岐山志



李喬岱字宗甫洋縣人萬曆中進士授休寧令斷訟如神恤災禦患盡力民事陞工部主事尋以戶部員外權稅許墅正供之外毫無科斂陞萊州知府喬嶺喬岱兄也歷官至鶴慶知府亦廉明有聲

洋縣志

陳瓚字玉崗潼關人以明經授岷州訓導陞大邑知縣清正和平惠義兼盡革除火耗纖芥不染力行教化幾致無訟民有陳青天之

謠潼關志

第五緯三水人萬曆中舉人學宗橫渠躬行實踐初廣文於郿重修橫渠祠陞萊安令慈惠愛民勤懇課士擢兩淮鹽運司副疏通鹽法禁絕苞苴廉聲益著

賈志

王維精字環中萬曆中舉人由教諭陞知肥縣會山左盜起捍城有方畧陞知應州州地險民困惟精撫循休息政聲卓然

朝邑志



劉子誠字叔貞宜川人以明經授湖南訓導教士以不欺爲本立行  
藝二格有善者記之行勤誦讀者記之藝擢鹽川令陞橫州持節  
定交趾之難所至皆有治績

賈志

宜訓字孟庭華州人以恩貢授義嵐令時邑山南多水患訓鑿山引  
水蓄洩有法灌溉民田數萬頃民胥賴之遷東昌府判尤多善政  
報最晉永寧知州因母老告歸

華州志

左史字子箴耀州人以明經除光州訓導署遂平固始皆有異政遷  
知扶溝吏舞文作奸史擇小吏謹愿者補吏延他邑老獄吏教習  
律令踰月漸次通曉手定爰書吏俯首繕寫莫敢仰視民多鬪殺  
史講習鄉約用古教化法兩匝月獄訟衰止縣故多盜史設法購  
斬盜無留跡縣西北地庫下水潦所聚河溢則助河爲患史疏決  
壅積家各占業縣北境接鄢陵尉氏地勢尤下三縣民互相穿穴



史躬自相度總計三縣病利作均水約束刻石水畔三縣共守之  
楚兵過中州所部畏其擾檄史駐襄城鎮之史遣人入楚籍記其  
將領部曲某兵前驅某兵後拒車馬芻牧各有成數乃按籍定約  
餽次舍庀餼糧峙器用兵所至如歸居人安堵市不改肆視事浹  
月聲藉甚以勞卒喪西歸民庶號慟

錢謙益  
撰墓志

高悌邠州人選貢萬曆二十年任祥符縣丞遇事斧斷丰裁侃侃難  
干以私百姓謳曰關節不通今有高公

祥符  
縣志

張橘字懷陸富平人天啟辛酉舉人任東阿知縣時邑多萑苻橘單  
騎諭以利害渠魁正法餘悉解散陞昌平守開荒修學遷本州兵  
憲庚辰奇荒賑米二千餘石人賴以生轉冀州少叅

賈志

金煉色南鄭人天啟壬戌進士任河內令剛明果斷掾吏有關白甫  
至前輒頤止之曰吾爲竟若說吏俯首塞默無一事豐蔀者當事



檄河內運豆餉邊力爭之始得豁

河南通志

張必大字可菴華州人天啟壬戌進士初授新城令調長清正直廉

明愛民禮士以治行異等擢爲吏部主事見逆璫祠不拜遂改工

部督理顯陵工省帑金三十萬權稅杭闕卒於道

賈志

許國翰涇陽人天啟壬戌進士爲儀封令開支河以洩水又捐俸置

義倉以備賑歷陞岳州道練水兵焚賊船洞庭積寇一清改充東

道用武剛車駕鴛鴦陣屢挫賊鋒充東人心始固終山西臬司

涇陽志

薛國柱吳堡人以貢生爲交城令修城禦寇積穀賑荒因豫寇亂陞

河南同知監軍督餉不避勞怨故所至有績終河汝兵備道

吳堡志

張國治扶風人天啟甲子舉人除獲嘉令撫字子遺周咨民瘼凡利

於民者必悉心區畫務求有濟時連歲荒祲國治力請捐租賑恤

上官難之國治涕泣請命語甚切直遂忤上官即日罷歸鄉里論



陝西通志 卷五十一  
者皆以為榮

扶風志

馬懋才字晴江安塞人天啟乙丑進士授行人久之以禮部郎中陞西蜀叅議撫治苗蠻諭以恩信叛者釋甲請降既免官居長安尋卒懋才為行人時陳延安災荒疏數上詔發帑遣賑延人德之

府志

袁楷鳳翔人天啟乙丑進士任開封知府廉毅有大畧郡號煩劇訟案苦沉積楷登堂令數事羅跪一時並聽剖決無枉人稱為照天

燭後陞河北守道

河南通志

王秉鑑字儒賢扶風人天啟乙丑進士初知鄆城治行為中州第一調光山鄆之叩閭乞留者數千人兩地皆勒碑紀績擢工部主事時都城戒嚴秉鑑冒鋒鏑陞見以守門濬河諸功加級賜賚陞鑑江守京口有止飲江心水之謠歷官浙江叅政致仕

賈志



李燦字斗明韓城人天啟乙丑進士授兵部主事歷汝寧知府時流賊猖獗燦守備甚嚴卒不敢近土寇占居四野計圖刈收二麥以困城中燦傳檄招撫許封以官寇渠殷守祖五十餘人入城邀賞先以花紅賺入城隍廟以三力士俘一賊盡殺之收種無恙士民得生

河南通志

調平陽捐貲修城不煩州縣人尤稱之

賈志

都景運字永泰涇陽人天啟間恩貢授興濟令邑多荒屯景運設法招墾調青縣修城禦寇築堤通漕陞河間府同知條陳截漕糧查海船清委收積招買諸事悉中利弊卒於官

涇陽志

劉含輝字四勿耀州人崇禎戊辰進士任恩縣令潔已愛民急公敬事陞高唐知州恩民赴闕保留仍命治恩又三年擢吏部主事孤立獨行不附中官十年不得調尋卒

耀州志

王健字大龍三原人崇禎中進士風格峻整動由禮節授聊城令強



幹清慎請改遼糧練餉立折馬之法以甦俵馬民咸稱便

三原志

張炳璿字義照涇陽人父鑑太原同知督餉偏頭關勤能有聲炳璿

以貢生崇禎時授滿城令甫匝歲而綏輯撫循邑稱大治以清直

不合於時歸里閉戶著書詩文多傳世

涇陽志

郭鼎藩字翰宇涇陽人沔縣教諭蔣汝艾字玉衡興安人西鄉教諭

寇薄沔沔令恇怯鼎藩慨然以城守爲已任泣勵義勇親冒矢石

賊被創去攻西鄉汝艾亦率衆破之當事稔其才使鼎藩署鳳縣

汝艾署南鄭兩人皆招撫流移殲捕盜賊克稱其職

涇陽志

黎玉田字含玉乾州人崇禎戊辰進士初任沈邱以才調杞縣英斷

不撓流寇嘯聚單騎擒之又有新鄉令房建極者三原人辛未進

士流寇至境建極率鄉勇捍禦城賴以全

河南通志○按建極後事詳見其子廷祥傳中

李國宗字象坤韓城人崇禎庚午舉人授河南許州學正代篆滎陽



蠲俸修城製火器不逾日大賊雲集四面環攻卒賴保全縣人爲

樹碑建祠

韓城志

孫鵬鳳翔人崇禎辛未進士知東明縣廉明有幹畧時萑苻多警鵬

單騎至其穴諭以威福渠盜感泣就撫部屋以寧

畿輔志

辛炳翰渭南人崇禎中由選貢知昌樂縣有禦寇全城之功

昌樂縣志

真定同知駐宣府司餉務裁汰餉額後併司理於餉廳全活誣罔

甚夥擢南陽郡守值兵燹後空城茂草流亡難復炳翰開荒田招

戶口盡心撫恤轉副使攝篆藩司廉聲籍甚及卒柩西還數百里

哭聲不絕

渭南志

梁夢卜三水人拔貢崇禎末授襄陽通判值闖獻寇逆盤踞樊鄧間

兵餉甚艱夢卜手檄諭山砦父老無不流涕助輸雖兵戈擾攘中

而飲高年崇學校有古良吏風

湖廣志



按國家設官分職首重廉能三秦夙稱材數尤多有守有爲之士但歷年寢遠遺事久湮雖賢聲猶播於人間而實蹟難徵於身後今錄其姓字官位俾後之君子猶有傳焉洪武朝有湖廣僉事雷亮撫州知府王崧俱咸寧人沂州知州裴榮鄭州知州馬煥暨子主事馴俱高陵人吏部尚書郭永道安塞人諸城知縣朱允恭保安人朔州知州石亨鳳翔人長壽知縣張思敬洋縣人山西叅政喬誠朝邑人邵陽知縣薛得中文水知縣張羽禮部侍郎康汝楫俱武功人永樂朝有涑水知縣李森咸寧人襄城知縣劉昇興平人高唐州判趙勉暨孫輝縣知縣元涇陽人僉事韶龔岐山人工部郎中何昇麟遊人陳州知州陳介南鄭人工部侍郎李彪洋縣人登封知縣谷庸城固人兩淮運使梁春鳳縣人保縣知縣柳方鄜州人正統朝有鄆陵知縣焦元



三原人河南知府虞瑄南鄭人景泰朝有祁縣縣丞呂鐘高陵人順德知府林恭芮城知縣李英俱寶雞人工部郎中張壽華陰人開州知州羅楫淳化人天順朝有冠縣知縣劉春富平人眉州知州李寧城固人紹興知府白玉洋縣人順天推官尚望武功人嵐縣知縣王準神木人成化朝有溧水知縣燕壽咸寧人隰州知州員龜咸陽人奉節知縣鄭昭延長人福建巡按黃寬鳳翔人新寧知縣蕭鵬汶上知縣馬驤俱朝邑人德安同知原性蒲城人高唐知州任福耀州人開封通判焦思剛盩厔人蘇州通判南漢渭南人夔州同知謝思道寧羌人安州知州韓綬石泉人定州同知沈道同州人順慶知府李傑韓城人正德朝有吏部主事劉序長安人南宮知縣种雲龍咸寧人順慶通判王仁盩厔人四川僉事梁耀膚施人義隴知縣楊榮扶風人



福建叅政柴儒白河人河南布政使南鏜商州人商河知縣李

綱同州人眉州知州原道蒲城人廣平通判耿儒武功人叙州

知府胡豐三水人嘉靖朝有解州知州朱昂兩淮運使李蘇新

鄉訓導孫學思俱咸寧人戶部侍郎胡嘉謀薊州兵備王之弼

渾源州知州韓廷學俱涇陽人蒙陰知縣曹汝葵富平人山西

按察使韓朝江醴泉人副使吳縉輝縣知縣侯羣鳳翔人永平

知府席上珍叅政傅應詔主事邢恩暨弟猗氏知縣綸崇明知

縣白牙郎中李佩俱南鄭人清源知縣李茂春兵部員外李嘉

賓澧州知州樊盛俱洋縣人彰德知府傅汝礪寧羌人通判欽

徽沔縣人山東僉事劉九容大同通判龍鳳俱榆林人蜀府審

理駱永聰漢陰人重慶通判王化同州人副使郝汝松綏德人

隆慶朝有永寧知縣姚登沁州知州郭然俱咸寧人汝寧同知



簡養直華陰人萬曆朝有四川副使王道純懷慶教授陳力俱  
咸寧人新鄭知縣韓期維主事張弘襟俱鄆人莒州知州來賓  
布政使秦一鵬叅政咎雲鶴南康知府張善治俱三原人僉事  
劉三才信陽知州王從諫俱涇陽人知州任澄清整屋人戶部  
尚書張經世渭南人襄城知縣李光先延安人大同巡撫李甲  
寶雞人龍安知州任祿南鄭人四川副使謝震城固人夏縣知  
縣韓薰洋縣人山西叅政劉廷謨寧羌人衛輝通判劉國銘榆  
林人山東布政使劉卿興安人四川按察使柴應乾白河人叅  
政馬怡暨弟尚寶寺卿慥同州人永平同知井東星河南叅政  
李用中俱朝邑人戶部主事張應辰宜君人漢陽令馬御綏德  
人天啟朝有兵部員外王懋學南鄭人崇禎朝有交河知縣王  
家佐三原人御史田起鳳南鄭人運副周達西鄉人知縣左佩



琰耀州人平陸知縣趙鳳雛三水人皆有聞於時



楊日昇字旭孟富平人七歲喪母不食者累日祖一正泣諭之始  
輟哀每獨居則流涕天啟辛酉舉於鄉後補陳留學博攝行邑  
事悉除苛政會中原多盜日昇練兵守陴戒賴以全擢臨晉知  
縣改高平首請蠲宿逋四千餘金築城浚池保障屹然順治二  
年用薦者起知輝縣五年調繁黃岡值湖南用兵禁旅雲集所  
需糗糧芻茭舟車版幹應期立辦勞績稱最九年大旱日昇虔  
禱得雨又捐俸勸賑以濟之民無失業量移嘉興同知未半載  
乞歸家居喜賓客矜然諾詩文瑰麗有六朝風得之苦吟力索  
者爲多

宋學程華州人前庚午舉人有膽畧明末盜賊蜂起學程家居守



禦有方初令沂水愛養士民有廉聲蝗不爲災隣邑蒙陰多積  
逋臺司稔知其才檄令兼攝不煩夏楚賦完報最擢永平府推  
官

國初以隨征功擢關南兵備道以病歸學程性友愛有從弟析居  
久念其貧復與合爨疎屬待以舉火者甚衆

韓文鏡咸寧人崇禎辛未進士歷官杭嚴道兼權稅務先是浙稅  
叢弊文鏡令依科則平納商民交口稱頌在官尤重禮教嘗捐  
俸設義學薪水膏火之資纖悉具備俾就業者得專志誦讀營  
兵亦來習禮一時風尚彬彬如也以親老告歸

張兆熊字宜男洋縣人崇禎丙子舉人性至孝居父喪哀毀踰禮  
流賊寇洋兆熊偕邑令郭一龍募鄉勇數百勦賊賊遁城得不  
陷洋邑舊有浮糧千石賦役繁苛民甚苦之兆熊力請當事禁



革殆盡歲荒捐貲賑粥全活尤多兆熊先任滑縣調孟縣尋擢御史歷淮徐郴桂叅政所至有聲在湖南兩經兵燹勞績尤著致仕後經略洪承疇薦爲蒼梧道辭不赴以德望舉鄉飲賓

薛起鳳韓城人崇禎丙子舉人性孝友撫孤姪孤甥督課不輟甥後舉進士有名起鳳初任黎城造耕織具教民農桑值歲儉勘實卽爲請豁又採山開窯制器以利永久其建置類多實政改任筠連抵任只携蒼頭一人以供掃室執爨之役士民服其清

正卒於官貧無以殮民爭致賻扶櫬以歸且建祠祀之

艾元復字意九米脂人由舉人除河南偃師令邑經闢

未蘇元復一意休息賑窮困招流亡數年竟成樂

史邑人泣送之越數年復過洛士民出境懽迎

得行



郭堯京字平野高陵人崇禎乙卯舉人順治十年知石城縣殘燬之後刻意興釐先是大盜陳其綸與東關盜黃允會各擁眾踞砦隣界羅漢巖劇寇復沿鄉肆劫堯京募鄉勇什險堵截其綸授首餘賊潛遁民賴以安在任八年陞祁州知州

郭忱華州人前已卯舉人知岢縣土瘠民貧忱課農桑興學校發奸摘伏豪猾畏之時海氛未息聞帥俞某與陳宦有隙假支應不給爲辭將爲亂各路戒嚴忱夜半奉巡撫檄赴營招安即予身詣俞言詞侃侃俞俯首聽命事遂解後卒於官櫬歸老幼泣送不絕

周燦字旭公臨潼人父祚永從學馮從吾由鄉薦令宿遷有善政燦其長子也崇禎壬午舉於鄉

國初授寧遠教諭順治間猗賊亂河西僞檄至燦率諸生立碎之



諭衆堅守賊不敢犯以薦擢梓潼知縣燦抵任遍諭流民勸以復業有至者爲經營廩舍散給牛種修青龍白馬二堰農業大興復設塘汛緝奸宄建壇壝禮師儒次第設施條理井井十一年陞雷州府同知雷孤城瀕海爲瓊南要路巨寇王之翰等盤踞西海十餘年燦請於臺司以招撫自任乃直抵賊巢諭諸賊以逆順利害賊皆羅拜聽命遂招降之翰等督撫特疏獎薦卅五年擢守鳳陽尋卒所著丹垠文集皆其弟燦所輯也燦字星公祚永季子順治乙亥進士由翰林改授刑曹矜全甚衆奉使安南宣布

天朝德意封祭悉協典制及還記其山川風俗以獻出守南康設救生船以拯覆溺修白鹿洞書院聚徒講學多所成就督學巴蜀甄拔孤寒一時賞識皆知名士獲雋者尤衆又奏請土司子弟



亦令照例入學著有願學堂集

李承尹三原人崇禎癸未進士初督三楚學政綽有師表及備兵  
沔上尤多惠政沔故有歲納官柴後業戶逃竄遺患比鄰承尹  
判田還里永蠲其征城東有蓮池舊納魚課遺累網戶承尹立  
碑蠲稅一方以寧

姚廷璉字華商膚施縣人貢生六歲失怙事母以孝任東平州倅  
攝州篆年餘勸農興學鋤奸除暴民賴以安境內有伏莽躬擐  
介冑殲之盜遂息當遷秩以請蠲浮費言過激忤上官遂罷歸  
會庚辰辛巳歲大饑罄資以貸貧者明年當償盡出其券焚之  
順治己丑王永強叛陷延安大兵進討廷璉從行間督轉輸寇  
平以功委知保安縣請除浮丁蘇民困邑人戶祝焉

陳安國字斗坦沔縣人生員



國初以僉事監軍四川巨寇攻保寧甚急安國詣西安乞兵總督孟喬芳應之圍遂解時姚黃賊衆數萬方猖獗安國招降之當事忌其功誣下獄未幾事得白陞井陘道境有鹵地產鹽安國請開局便民至今利賴尋以專擅去官會言者白其罪補九江道屬邑多荒糧安國力請減免以數萬計百姓德之致仕歸修黃金峽險道三百里建連雲棧圯壞橋梁數十處土人立碑記其事

劉培陽字敬錫三原人順治乙酉舉人授建德令時劇盜李布嘯聚培陽至審形勢設方畧甫三月盜平政聲大著補直隸南和澧水溢没田千畝培陽築堤捍禦人名其堤爲劉公堤立祠尸祝焉

王繼祐字植三富平人順治乙酉舉於鄉授鎮平令不以繁苛擾



民郡城協濟夫馬舊例徵折貯庫恒苦不支繼祐因事樽節遂多餘息河東鹽課計口銷引南陽丁浮於課鎮平課浮於丁繼祐力請當事裒益得平有捕官悞收僞引事覺吏白派補里甲繼祐不許獨捐俸助之鹽使爲疏其事於

朝後乞歸子象天順治丁亥進士令臨漳多善政繼擢太僕寺丞疏陳臨漳三害一協濟宜恤一經界宜明一優免宜均俱

報可漳民三累遂除歷湖廣學道以廉明著

郭凝然字因之朝邑人順治乙酉舉人由交城教諭遷閩清令鄉試分校府推官以千金屬其私人執不可以憂歸補靖江瀕海多盜守禦有方盜逼城下登陴諭以大義即引退再補昭化有女子爲盜主交通甚廣前令蒞任皆先往致敬凝然至吏以故事白怒斥之亡何女子來謁偉岸桀黠不可馭凝然叱捕下獄



須臾訟者盈堦款証皆實立斃之其黨震散撫御殘然以清白  
自矢地產塊金俗呼狗頭金有獻者悉却之解官後囊無長物  
楊在陞字台卿三原人順治丙戌進士任河南扶溝令扶溝地瘠  
民流在陞諭令復業三年始算緡行折畝法給以牛種又請免  
河夫四十名由是田塍盡闢增賦七千石有奇大盜張元錫等  
倡亂請於中丞擒而磔之時有劉司馬者爲僕劉馨所訐遂被  
逮在陞曰以僕訐主不可訓也直之馨嗾其黨將爲亂在陞因  
立寘於理邑民乃安

韓文富平人順治丙戌舉人授文安令邑居畿南下流水潦四注  
賴河堤爲固文蒞任堤潰歲大侵文捐俸易粟民無失所城東  
土寇猖獗文親率鄉兵捕誅賊首境內以寧又文邑旗民雜處  
爭訟日滋文常單騎遍歷莊屯多方開諭俗用丕變



王承祖字貽雲渭南人順治丙戌領鄉薦除晉江令捍禦海寇城賴安全邑瀕海有大鎮最稱饒沃利其有者誣鎮民與賊通欲屠之承祖力辨於大帥事遂寢尋擢兵部主事遷郎中累陞工部侍郎告歸值歲饑承祖罄所有賑濟全活甚衆及歿鄉人思其德立祠祀焉

李振麟韓城人順治丙戌舉人初令臨武臨邑自賊首曹戣子盤踞積年人民蕩析城中茅舍百間盡屬兵營振麟多方招撫逃亡稍集臨舊有二十四里兵燹後流移過半丁糧不均振麟力請於上官編爲十二里侵隱之弊一清邑境與粵東接壤逼近猺崗振麟練鄉勇八百人立練總四名統之扼要設守諸猺不敢犯界考績擢中書舍人以母老乞歸母壽九十八振麟孺慕終身



劉璽字爾符朝邑人順治丁亥進士除烏程令邑附郭素煩劇璽釐剔奸弊豪強懾伏漕糧立倒廩法他縣多倣之擒治太湖巨盜親搏戰水上獲渠魁白花蛇沈三斃於獄羣盜震懾遠遁會長興歸安同時缺令兩縣民爭求璽署縣事歸民先得璽肩輿去臺司感其事遂允之以憂歸因錢糧磨勘謫四川按察司照磨署通江簡州皆有惠政生平多著述有鑠山集若干卷子岫岫字星柱康熙戊午舉人辛未壬申間歲大祲邑令諱災岫力請臺司簡牘累上會

臣勘賑岫具呈朝邑災狀乃得賑全活無算岫已卯舉人有文

治

城人順治丁亥進士初授邢臺令邢故有水泉漫漶日久獲利襄至即度地開渠以資灌溉西山袤延數百里羣盜



盤踞四出剽掠襄訓練鄉勇親勦賊巢渠魁授首民患以息內擢臺員旋出按江西甫入境有郡守暮夜餽金襄拒不受廉得其貪污實蹟即劾罷之他如興屯政設江防奏豁荒欠審結歷年讞案嚴禁開採皆有裨實政視事一年外艱歸服闋檄取補官以母老乞終養遂不復起

張重齡字九如涇陽人順治戊子舉於鄉十二年授直隸邢臺令重農息訟除積弊雪冤獄政績茂著報最補工部都水司主事奉

命督通昌草場督寶源錢局又出督臨清稅務兼攝倉儲錢法裕國通商措施悉當大司空重其才會河決淮安遴員協理以重齡名

上先是南北河決塞不常中河一役九載未就尤稱危險重齡至遂



奏績復

命後以積瘁成疾給假歸卒子鼎梅康熙丁丑進士

劉矩宗字仲旋渭南人順治戊子舉人授温州司李方海孽未靖人心反側矩宗開誠撫納歸降日衆鎮以安靜有犯者執法不少貸民畏而懷之海濱地久蕪矩宗親行勘視免其虛稅更築長堤以資蓄洩開東甌括婺諸驛路行旅便之卒於官

王帷籌華州人順治戊子解元先是逆變起帷籌負母入山備歷艱苦康熙四年授祁縣令創義學講書課藝無虛日祁水舊爲豪強所據帷籌責令毀壩俾無壅塞資民灌溉農事畢婦子携羊酒祝之并立祠祀焉五子俱成名

焦勤武功人順治戊子舉人初宰臨桂息事寧人循聲大起擢刑曹治獄明允會



問粵中利弊條對明晰仍奉

命恤刑西粵全活甚衆尋備兵井陘值歲旱率屬終日跣赤日中甘雨立沛人以爲精誠所感罷歸後母卒過哀成疾仍晨昏侍父所分析田舍盡以膏腴讓弟雖俸餘亦不已私父國鼎少年時自書院晚歸途遇一女私奔毅然却之蓋義方特著云

朱廷璟字山輝富平人前兵部侍郎國棟子闖逆據西安多械致士大夫攫其金廷璟被執俄賊敗得免順治乙丑成進士改庶吉士累遷登萊副使時登兵以缺餉謀作亂守白其狀欲捕之廷璟曰是速亂也不可閱庫金與缺額相當立召諸弁唱給之餉至仍如數納庫中軍無譁者海寇陷瓜儀圍江寧聲言將分兵突山左一日夜候騎數十至將吏皆失色廷璟但密增沿海戍守舉止自如逋寇于七勢甚熾廷璟至即蒲伏聽約束廷璟



諭遣之語人曰賊子瞻顧非常宜漸除之會陞河南叅政去後  
果亂海上未幾廷璟以憂歸再補左江遂致仕林居後絕口不  
談世事性好古遇鼎彝書畫輒摩娑不去手人以是覘其風度  
王孫蔚字茂衍臨潼人與叔元衡元士同登順治壬辰進士由刑  
曹歷官湖廣按察福建布政以公事左遷備兵川東視學楚省  
未幾歿於任蔚少有神童之譽弱冠舉鄉試第二尤長於吏事  
在刑曹都下有玉銘錢穀茂衍刑名之謠玉銘者王大司農弘  
祚也任楚臬時值軍興羽書旁午臺府倚重一時綰五篆手握  
朱墨二筆判事如風雨諸司掾持案沓進目覽口誦悉皆瞻舉  
詩才亦婉麗成一家著有軺香集子天寵登賢書

蕭恒字月如三原人順治壬辰進士授安福令邑田水衝沙壅多  
虛糧恒力請直指題減糧額千餘石至今賴之遷邛州知州



侯于唐字賡明三原人父達先有隱德嘗歲荒代鄉人輸賦千金請於官取逋賦冊悉焚之曰吾安敢重煩大令爲吾追逋乎于唐登順治壬辰進士由庶常擢御史終養歸再起巡鹽巡漕奉詔以敬慎剛方褒之居鄉葺學宮築白渠堤民賴其利祀鄉賢

張好奇字知天朝邑人順治壬辰進士初知鞏縣念河濱灘地起科時遭衝沒遺稅病民力請每三年一勘丈以地有無爲存豁鞏人德之元慎刑獄擢刑部主事矜全爲多歷官河南學政

索景藻字二因蒲城人順治壬辰進士邃易學性尤謙謹生平不道人短嘗之田見人有盜刈其麥者遽避之任樂平知縣初任時盜賊充斥景藻不加刑戮諭以大義期年而境內大靖舊賦逋額累萬景藻曲爲勸諭不三月輸納一清以勤勞得疾卒於任士民哭奠日數千人祀名宦



習全史同官人順治壬辰進士初令涇縣補內江有聲陞杭州府同知善聽訟漁臨關有奸宄與關蠹交通害政甫下車即行剖禁諸暨某持兩脛足屢控不止全史曰此必暮夜行竊爲主人所折顧以誣人可乎立投於江某驚服訟始息後卒官貧無以殮制府李率泰爲歸其櫬

楊端本潼關人順治乙未進士授臨淄知縣開淄西龍首渠民享其利廉明仁恕輿頌歸之性孝侍親疾湯藥必親嘗處鄉里謙厚敦睦性好施濟親黨中貧不能舉喪者捐金助之

石之玖甘泉人順治戊戌進士歷睢寧桃源知縣有惠政二邑皆濱河河臣靳輔方鳩工未集會

翠華南幸引

見之玖有老成勤慎諳練河務之褒守令以下咸榮之尋擢福州知



府

王又旦字幼華邵陽人順治戊戌進士授潛江令潛賦役偏重又旦摘發隱漏逃亡返業潛地居襄樊下流漢水歷安陸下大別每夏秋水漲爲患又旦勸民趨事長堤屹然迄今無恙甲寅滇逆告變大軍駐荆襄潛當孔道羽騎絡繹徭役芻蕘應時立辦擢給事中歷吏戶二垣尋典廣東鄉試還過花山建議設縣置官以成控扼之勢盜藪一清有黃澹詩集十卷行世

牛光斗中部人方流孽未靖仇家構陷其父以通賊繫獄光斗度勢不能脫即詣軍前請於帥求以身貸會烈日中忽大雨雹帥廉其冤釋之順治戊戌成進士官諸暨令減耗羨懲刁悍邑有機戶三百家例供織造使者樣紬一疋光斗申請革除坐強項落職百姓咸詣臺司訟冤奉



旨復任尋丁內艱歸年七十九卒

李光宸字君沃三原人少有遠志多大略逆藩變作制府哈占重其才延之幕下一切機務咸諮之會蒲城令以民叛告制府將屠之光宸以爲未叛制府按之果誣始得寢十八年占奉

命與奮威將軍王進寶勇略將軍趙良棟謀分道取蜀議未決光宸進曰逆無能爲也湖南特下流地今退屯衡州所用皆親屬猜嫌易起大兵乘之如拉朽耳進寶良棟大奇之令從軍入蜀即舉爲廣元令廣元久經兵燹人無固志有訛傳逆黨譚弘復叛者光宸晝夜戎服行城上語民曰我縣令也賊來我以身當之汝曹無恐人心始定先是保寧兵餉悉由廣元陸運光宸曰盍以舟運出昭化力請於制府從之公私俱利以內艱歸服闋補金堂初金堂與新繁諸邑並以清白江爲蓄洩年久渠壞光宸



詳視地勢復開新渠於是灌漑如舊元宸性明決而資復愷悌故所至有惠澤

劉元勲咸陽人順治己亥進士七齡失怙哀戚如成人登第後讀書中秘以祖母年高求得終養祖母卒宦遊所歷必奉母偕行及卒哀毀踰禮服闋分巡淮徐改山西糧驛道嚴禁官馬累民委賑大同無言無偏發粟處有槐一章民懷其德號爲劉公槐尋致仕歸逢歲祲周給里黨兼爲族人輸舊稅親疎感之

董元俊華州人順治己亥進士事親至孝初任黃岡知縣繼補句容除積弊二十條興額外利七事歲荒捐俸賑濟邑有虎患獵捕不得元俊宿廟虔禱虎遂遁跡致仕後引掖後進周恤宗黨歷久不倦

李弘樸字元文三原人由恩貢授永州府通判擢知桂陽州桂陽



新遭兵燹，檣勞來安輯。凋敝頓起時，大兵進取滇黔，轉輸不給。檣繪圖上陳，請寬民力。竟左遷去。桂人籲留，不得勒碑以志去思。家居，施予不倦。濬河築梁，倡始捐助。里人皆沐其澤。子彥琄，功擢肇慶府知府，撫綏釐剔，政聲大著。再補黃州守，卒。祀名宦。彥琄字重五，從學李顥，默契儒先宗旨。每無事，輒靜坐認取未發氣象。丁卯登賢書，官中翰。聞兄訃，哀痛幾絕，尋卒。

耿獻忠字伯良，武功人。貢生順治初，分巡閩中。適海氛未靖，將士俘獲不辨，玉石獻忠詣臺司力爭，得訊釋數千人。遷廣東左布政使時，武弁驕橫，士夫多被摧折。部使者重獻忠名，悉聽裁決。粵東巨族多賴以寧。

姬琨字雪石，華州人。贈太僕文引子，以難廕入成均，歷官戶部主



事督昌平糧儲會計如額擢戶部郎中又出爲榆林糧儲時榆林兵乏食琨先事籌畫兵賴以安奏請創立鼓鑄泉貨流通利垂永以復權江南蘆政兵燹後民多流亡琨招集勸諭田廬如舊課亦無缺遷保定巡道盜賊一清又遷衡永道薌餽除奸實政茂著嘗登衡山西望慨然有歸休志即去官歸

任璣字公義涇陽人少力學工文順治辛丑進士筮仕滕令滕邑自明季流亡保甲盡廢璣畫境爲八卦保置長鄉設約其東界連山密箐中多伏莽璣擒斬首惡餘令歸農其南界接境徐碭距縣治遠踰數百里民抗不輸賦璣開誠勸諭化爲淳良復以戶口版籍無憑力請編審自此欺隱都絕賦無逋額先是河臣令璣督浚八閘河道如期告竣擢兗州府倅分司泇河尋改運河同知運河自黃淮以上灌輸恃七十二泉璣遍歷相視疏源



陽江志卷之二十一  
三  
條流糧艘無阻又築漕河東堤泗河西堤以扞水患時奸民請  
築南旺西湖以擅水利璣謂汶河秋漲賴此洩水築之則八斗  
必塞運道將梗事遂寢遷長蘆運使建議引鹽積滯必通銷於  
引鹽不至之地其產鹽州縣例不食官鹽者奸商坐引至數千  
計悉請罷於是商力漸甦鹽課無損陞直隸守道以良鄉旗民  
經界未正奉

旨勘驗溽暑積勞竟得疾歸卒

張召南字仲文朝邑人順治辛丑進士知安福縣民俗愚戇不供  
役召南單騎往諭以大義咸感泣輸賦邑境南接茶永西連沙  
攸康熙十三年永寇楚逆俱蠢動賊將取徑安福兵萬餘薄城  
下城遂陷召南赴制府請兵以復其城時議分滿兵駐安福召  
南力陳不可乃止是年秋召南方在省賊突至城復陷召南馳



歸集鄉勇攻城賊疑大兵至踰山而遁遂復安福凡招撫賊將五十七員難民萬餘人因勸諭開墾散給牛種得田二千餘頃擢中書舍人

衛秦翰韓城人順治辛丑進士少孤育於伯父景瑗景瑗死闖難兵燹相仍旦暮不給秦翰閉戶力學成進士後猶莊誦如諸生時授靈壽令民田水衝沙壓戶口逃亡逋賦無著前令率被劾去秦翰至遍閱災地詳詢疾苦請令祇納本年正賦巡撫惡其擅將劾之檄太守親勘勒令開征秦翰不奉令太守怒杖吏且荷校以脅之秦翰曰不開征一吏死開征則百姓死矣言詞剴切太守亦心動秦翰又繪圖謁巡撫備陳流離狀哀懇不已巡撫惻然入告永豁地糧二千六百有奇自此歲豐民樂邑無逋賦遷中書科中書二十八年擢禮部主事歷郎中尋出知龍安



府下車即革里民供應陋例在任九年鎮撫苗獠結以恩信所隸三十一司皆輯服以年老致仕歸數百里中多泣送者

陳嘉績三原人康熙癸卯舉人授濬縣令以風化爲已任作合律聖諭解刊書遍給勸懲並用民風大洽又悉除絕戶女丁錢孤寡咸額手相慶再補澄海因邑居海濱招集鄉勇嚴飭守望有海寇千餘乘夜薄城嘉績率衆登陴矢石雨下賊大潰邑以無恙事

聞擢御史歷掌河南道法司鞫獄凡夾訊者或至日昃散署始釋嘉績語法司宜共體欽恤至意令得供即釋洊陞大理寺少卿扈從

蹕西巡過濬士民擁道爭願識舊尹陳公面未幾乞歸先是嘉績父諸生堯道潛心醫學製方奇效所著有傷寒辨證痘疹辨證二書嘉績校定付梓以竟前人之志焉



趙璠麟遊人由恩貢判景州佐理有聲擢興化令省催科重農桑  
民貧不能耕者貸給牛種俾無失業值歲荒發粟賑濟多所全  
活邑地居淮河下流每歲工作枝帚悉賦於民璠令河壩遍植  
柳葦以備修築之用省費無算未幾致仕歸尤敦孝友任恤之  
誼

梁鳳翔咸寧人康熙癸丑進士性純孝少失怙善事孀母母疾日  
夜籲天願以身代母疾遂愈二十五年授孝感令履畝均賦積  
弊一清壬申癸酉間秦楚游饑鳳翔捐俸勸賑多所全活擢潞  
安太守革除漏卮勒石永禁期年政成以足疾乞歸潞人懷之  
郭毓秀字鍾山耀州人舉人知贛縣事康熙甲寅閩粵之變大兵  
多道贛有蜚語謂玉田村民通逆主兵者謀殲之毓秀言於撫  
臣佟國楨鎮臣哲爾肯曰



國初兵寇交訐贛四境蕭索獨田村驚谿一二井里能自保聚遂致蕃庶遽以大逆誣之非惠養元元意也國楨爾肯皆然之毓秀即馳入田村令毀其壘村民供輸芻糗倍於他所遂得保全邑人至今述其事猶有墮淚者

劉蔭樞字相斗韓城人康熙丙辰進士性至孝事親先意承志視羣從如同懷值歲饑盜起里黨多不給爲貸粟賑荒築堡以守大河自縣東北南出龍門山中兩岸絕壁鈎挽莫施蔭樞冶鐵爲柱索舟緣以進又築濠水石橋修柿谷坡及城中通衢行者便焉初任蘭陽報最入諫垣章數十上如論秦豫兩省事宜及楚省均糧事皆關大計悉報可旋出分巡贛南除私收門稅又米市有牙帖銀協濟定南蔭樞計歲入置田以租充額牙稅永除癸未



薦幸西安時蔭樞家居因迎

覲潼關即擢雲南按察使進布政使滇海秋漲爲害請疏之兼建  
六河岸閘蓄洩有備尋撫黔甫至釋苗狎之淹繫者數百人會  
烏蒙威寧土苗構難

命滇蜀黔督撫提臣於畢節會勘蔭樞至傳檄召之諸苗素服蔭樞  
恩信率衆偕來蔭樞諭以

聖朝德威諸苗帖服遂釋去五十四年西鄙出師蔭樞奉

旨馳赴巴爾坤周閱軍營既復

命仍撫黔未幾奉

旨屯田塞下歷三年

召還京師六十一年與千叟宴雍正初

皇上篤念老成賜金歸里年八十七卒所著有周易蓄疑春秋蓄疑



梧垣奏議宜夏軒雜著行於世

劉曾字魯如臨潼人父秉攜遂易學有學易寤言八卷曾生而穎異弱冠即從李顥講學康熙己未成進士授淑浦知縣淑浦山深地僻糧役不均曾履畝親丈官無遺利地有餘力事竣湖南撫臣下其冊於所屬俾爲式三載擢吏部主事遷員外有墨吏以千金爲壽曾笑曰劉曾豈受暮夜金者耶正色却之再遷郎中補貴陽知府黔地多苗狎家尤稱獷悍時竊出行劫黔民亦時誘其幼弱者鬻於隣境曾爲捕奸民略販者得數十人正其罪所得苗子女悉還之有不知所自者令郡民無子女者撫之苗狎聞而感泣不復行劫郡倉歲贏米百石曾令別貯一倉春秋時有耕獲不給者補助之郡大治會考最得

俞旨



賜蟒服旌勞擢雲南驛鹽道尋陞按察使五十六年致仕歸

史流芳華州人康熙壬戌進士授廣東臨高令臨積逋八萬有奇流芳先核逃亡戶口每歲征止三千餘金復履畝丈量分別荒熟請豁者十之七於是招集流民捐給牛種課農興學邑人頌之流芳父母早亡終身哀慕兄客死肅州徒步三千里扶櫬而歸撫兄女如已出爲之擇配凡從子弟之孤者悉爲婚嫁幼時經師卒爲營喪葬無缺少貧苦冬夜讀書嘗置足草籠中成名後猶手不釋卷博通淹雅教授生徒出其門者多知名士

陳朝君韓城人康熙壬戌進士事母至孝與兄弟叔姪三世同居友愛甚篤初令蒙陰重學校嚴保甲革行戶蠶稅設催科紙皂吏民安之朝君聽訟明決嘗於省會一日審結十大案臺司皆器重之擢戶部主事外省奏銷例有私餽盡斥之遷刑曹多所



平反視學中州號稱得士

趙隆引膚施縣人拔貢生授固始令多惠政上官議加賦隆引固  
爭之不得以憂卒上官感悟寢其事時有固始一官死汝寧萬  
姓活之謠

党光前膚施人事繼母以孝聞由拔貢除德平令政尚慈惠讞獄  
尤詳慎曰蒼鷹乳虎爲世所痛吾忍蹈之乎德平旗逃多所株  
連光前發摘甚神不能誣枉保全甚衆後以病卒於官櫬歸士  
民執紼泣送數百里

焦映漢武功人太學生初爲巴縣令值譚弘等復叛巴人震恐映  
漢募鄉勇捍禦全城以卓異薦歷刑部員外郎中尋出守平樂  
調慶遠大中丞彭鵬每歎賞其才晉雷瓊巡道映漢宣揚

聖諭導民向化明邱文莊海忠介瓊產也風節冠一鄉而遺文散佚因



重刊爲粵人倡及司臬江蘇會總督與巡撫張伯行不協並誣  
劾映漢

聖祖察其冤復原職改任廣西卒

王承烈字遜功涇陽人康熙乙酉以五經發解己丑成進士選庶  
吉士授檢討雍正初轉監察御史巡視東北兩城時有巨猾倚  
宦勢爲奸謀陷富賈吞其貲承烈搜捕之寘於理輦下肅然嘗  
召對

養心殿講大學明明德章稱

旨賞資甚渥次年以諫垣督湖北漕從民請就便南兌省運費數千  
緡旗丁撥運則以保甲法聯之軍民帖服報最擢江西布政使  
司署故有通吏二人擅竊威柄承烈斥弗用鈞考振作諸弊一  
清累陞刑部侍郎遭疾猶勉力視事卒之夜有慈烏數千繞室



賜祭葬有加禮云所著有日省錄毛詩解尚書今文解諸書



